

ديوان الالتهاب

الجزء الأول

تأليف

عبد العزيز بن عيسى الشهابي

منشورات

مكتبة العلوم العامة

ديوان
الالتهاب
الجزء الأول

حقوق الطبع محفوظة للمؤلف

الطبعة الأولى

1415 هجرية

1995 ميلادية

الطبعة الرقمية

1444 هجرية

2022 ميلادية

لا يحق لأي شخص أو مؤسسة طباعة
أو ترجمة هذا الكتاب أو جزء منه إلا بإذن
خطي من عائلة المرحوم المؤلف.

ديوان الالتهاب

الجزء الأول

تأليف


المرحوم الملا الحاج عبد العزيز بن عيسى الشهابي

مكتبة العلوم العامة

المنامة - البحرين

بِسْمِ اللَّهِ الرَّحْمَنِ الرَّحِيمِ

صورة المؤلف



المرحوم الملا الحاج عبد العزيز بن عيسى الشهابي

الأهداء

إلى محمد المصطفى ...
وعلي المرتضى ...
وفاطمة الزهراء ...
والأئمة النجباء ...
عليهم السلام.
أهدي هذا المجهود المتواضع

راجياً القبول.

بِسْمِ اللَّهِ الرَّحْمَنِ الرَّحِيمِ

الحمد لله جل جلاله بما من على من أفضاله، وجعلني خادمة للنبي وآله، متمسكا بحبهم من عهد الصغر، في السفر والحضر في خدمة الله وخدمتهم في البحرين وخارجها على المنبر الحسيني، وقضيت أعواما كثيرة في الإحساء والقطيف، والكويت، والبصرة، وقرى إيران مثل: القصبة والمانيوحي، وعبادان، وجزيرة صلبوخ، والدورق، والبزيرة واوشار، ومغامس، وكذلك قطر، وأبو ظبي، ودبي، والشارقة، وبلدان مسقط، والخابوراء، وعارضني صوتي ولا زلت في خدمة الله وأهل البيت والمؤمنين حتى قضيت على ما يزيد على خمسة وأربعين حجة وخمسة وأربعين عمرة مفردة في رجب ولكل حجة وعمرة سفر لحجز البيوت في مكة والمدينة فيه عمرة، وأما السفر لزيارة العتبات المقدسة عند الأئمة (ع) فلا أقدر أحصيه من فضل الله، وإنعامه

علي وأرجو بمنه وكرمه الزيادة بحق محمد وآله.

نسأل الله قبول الأعمال فيما مضى والتوفيق فيما بقى من العمر لما يحب ويرضى، انه سميع مجيب.

كما وانني في أيام شبابي كنت أحب الكتب والقراءة فيها، فحملني حب الكتب على أن افتتح مكتبة لي لوقت الفراغ

للبيع والمطالعة، وسميتها بمكتبة العلوم العامة، وبلطف من الله صارت مكتبة عامة، وأنتجت مطبوعات كثيرة تزيد على ٣٠٠ مطبوع للرجال والنساء، وصارت الناس تقصدها من البحرين ومن خارجها والحمد لله على ما منحني من طاعة ومحبة أهل بيته، وهذه نفثات الحب والولاء لله ولمحمد المصطفى وآله النجباء متمنيا من الله ومن محمد وآله العفو فيما يقع في هذا الديوان من السهو والنسيان والغلط والخطأ ومن المؤمنين القارئین في الديوان من رجال ونساء.

أرجوكم يا قارئ عبارتي أن تسألوا الله يلبي دعوتي
بالعفو عني من ذنوبي كلها وبمحمد وبآله هم قدوتي
فارجو من الله الكريم بحبهم ابني لبيت الوقف قبل منيتي
واشهدكم اني على منهاجهم دين ودنيا سادتي وائمتي
فليكم مني السلام إذا خبا جسمي وصرت ممددا في حفرتي
وإذا أردتم رحمتي بدعائكم فإليكم الديوان فيه صورتي

والسلام عليكم ورحمة الله وبركاته.

والحمد لله رب العالمين، وصل الله على محمد وآله الطيبين الطاهرين. ونسأل الله العليّ القدير أن يوفقنا لإنهاء الجزء الثاني إنه سميع مجيب.

الفصل الأول
في رثاء
النبيِّ محمد (ص)

في شأن النبي محمد (ص)

مرمي على فراشه النبي يجذب ونيه
والخلق كلها تنوح في أرض المدينه
الزهرا تون من شافت المختار ممدود
ويصعد أنفاس المرض وبنفسه أيجود
صرخت يا بويه والدمع يجري بالحدود
تكسر الخاطر شوفة الزهرا الحزينه
يا بوي يا كهفي ويا عزي ويا دلالي
مسجي على فراشك وشوفك دهش بالي
من بعد عينك يا الأبو وأضيم حالي
خاف الأعادي تجور من بعدك علينا
هذا علي المرتضى جالس وينعاك
نوبه يجرونه ونوبه إيسكت أبنائك
والكون مملي بالحزن من أجل فراقك
وكل على فراقه يصرخ وانينا
وجبريل ينادي في السما والدمع مدرار
والخلق كلها تنوح من أجلك يا مختار

وسفه عليك تموت يا صفوت الجبار
ليت الخلق فدواك يا عزنا وحمانا
الله ولا أحد يا رسول الانس والجان
الله اختارك في الرسل خاتم الاديان
رحمة الباري في البشر يا نسل عدنان
ونينك يرج الكون يا نور المدينه
وأعظم مصيبه دخلت الزهرا بالسبطين
شافت أبوها يون ومغمض العينين
الطمت الهامه والقلب منشطر شطرين
وهوت عليه تقبله الزهرا الحزينه
تنادي يا بويه وداعة الله حان حينك
إنتحل جسمي وداب قلبي من ونينك
منهو إلى أولادي وليّ من بعد عينك
بعدك انا ما اريد هالدينه الدينه
التحرك يا ولي المصطفى ودموعه تسيل
أنا معاكم يا بتوله تالي الليل
لازم تسمعين النعى من صوت جبريل
والكون يرجف والخلق تبجي حزينه

وفتح اعيونه ايودع الزهره الزقيه
واصاح الله اساعدچ يا هاشميه
انا معاكم بس يا بنتي هالعشيه
او قبل الصبح عزچ يا بنتي تفقدينه
وساعة القشرى من نزل قابض الأرواح
اوراسه الحجر المرتضى والدمع سفاح
واما الحسن وحسين ايضربوا راح ابراج
او كلمن على فراق النبي يجذب ونيه

* * *

في شأن النبي محمد (ع)

نزل جبريل الأمين أعلى الرسول ابودعه
والملاك اتنوح كلها والخلق في زعره
ساعد الله قلب ابو حسنين عند راسه ينوح
اوقابض الأرواح عند المصطفى وينزع الروح
والبتوله اتصيح يابا عقب عينك وين اروح
والحسن وحسين كل واحد يهلل مدمعته
والسما تهتز لموته والملائك معوله
الله يساعد قلب ابو والحسين قام ايغسله
اقلبه اعلى المغتسل ودموع عينه سايله
والخلق كلها اندهشت بالمصاب امر وعه
أسدل عليه الردى بعد الكفن في حجرته
فوق راسه نادت الزهرا دخلوا اعمامته
اوشوفوا الأنوار تسطع في جبينه وغرته
لا تشيلونه من داره الچيد مني امقطعه
خلوا رب العرش إلي عظمه ايصلي عليه
يأمر الأملاك كلها من السماء تنزل إليه

تهلل تكبر على جسده وتصلي عليه
والخلق تبكي وتسئل وين قبره ومضجعه
وأعظم امصيبه علىّ حين جيته للقبر
انهدت اركانى على افراقه ولا عندي صبر
لكن البارى امرنى وسلمت ليه الأمر
ايذوب قلبي من اشوف اجنازته واطالعه
ناحت الزهرا على بوها وصرخت بالعويل
واليتاما اتنوح وياها او مدامعهم تيسيل
لا تخليني يويه بين هالأمة وتشيل
عقب عينك باليتم اصبح يويه امر وعه
اخاف حقي من بعد عينك يويه ينهب
اخاف جسمي من بعد عزي يويه ينضرب
او حيدر الكرار من حقه يويه ينغصب
والحسن وحسين باليتم امر وعه

في وفاة الرسول (ص)

لملاك ضجت في السما والفلك هاديننا
والناس تصرخ مات هاديننا المختار
الله اولحد ماجت السبع السماوات
والأرض كلها اتموج وارتفعت الضجات
وش هالمصيبه لما جرت بالكون هيهات
والناس مدهوشه تصيح اصغار واكبار
ويساعد الله ام الحسن وحسين يا ناس
من شافت المختار ابوها ماله انفاس
نادت او صرخت بالبجا ولطمت على الراس
اوطاحت على جسمه اودمع العين نثار
والمرتضى نوب اودعه ونوب اشمه
واما الحسن وحسين مفجوعين يمه
ينادون وسفه عليك يا رحمة الأمه
يتمرغون إعلى جسد جدهم المختار
ومصيبة إلی زلزلت أرض الوطيه
وخلت ادموع الكون بالعبره جريه

من حطه فوق المغتسل راعي الحميه
نادي عليه انهد ركني وصبري انهار
وغسله ولفّه بالكفن الله يعينه
ونادي على الزهرا تعالي يا حزينه
وتودعي من المصطفى نور المدينه
وسلمي الأمر لله الواحد القهار
حطه يولي بالنعش والتمت الناس
هذا يدك صدره وهذا يلطم الرأس
وتسمع بواحي بالحزن وامجادب انفاس
والخلق مدهوشه وتصرخ مالها افكار
هذا ينوح عليه او يلطم فوق صدره
والله أسافه على النبي أنضمه ابقبره
وتبقي يتيمة من بعد عينه الزهره
ما ذوبها إلا اتنوح لجله ليل ونهار

الزهراء (ع) بعد وفاة والدها

من عقب عين المصطفى الزهرا حزينه
تنادي عليه استوحشت ارض المدينه
مقدر اتصبر من بعد عزي ودلاي
ومقدار اشوف البيت منه صار خالي
واذكر على المنبر اجلوسه ايزيد حالي
ومقدار اعيشن بالهضم ثكلي وحزينه
يا بوي ما عندي صبر من بعد فراقك
ياليتني وسط القبر دفنوني وياك
ياليت تنظر حالي وحالة يتاماك
ايذوب قلبي من اينادون ابأبونا
يا بوي مني انغصب حقي وانهبوني
وهجموا عليّه وسط بيتي وسقطوني
ولطموا اعيوني وصوطهم ورم امتوني
اوشفت الوصي الكرار حيدر قايدينه
شفته يا بويه املبب او ما عنده اعوان
ابلحبال إجرونه او هو فارس الفرسان

اوسيفه البتار الذي زلزل الأكوان
ما چلت ازنوده ولا انشلت يمينه
لكن اوصيه بالصبر يا سور منعي
بالدار جالس والعدا ايكسرون ضلعي
نوب عليك اونوب لجله ايسيل دمعي
اوصرخة حسن وحسين قلبي امفطرينه
من عقب عينك يا عزيزي وين انا روح
من البيت طردوني ومنعوني من النوح
ياليتني من قبل روحك راحت الروح
ولا عيش بعدك بالقهر ثكلي وحزينه
يا بوي بعدك بالقهر ذايب افادي
فراقك ذوب مهجتي ويتم اولادي
وحيدر على فراقك منه القلب صادي
ايصعد انفاس اوبالحزن يجذب ونيه

في وداع النبي محمد (ص)

الملاك ضجت في السماء الوداع الوداع يا رسول الله
بعدك الدنيا مظلمه الوداع الوداع يا رسول الله

الفلاك لجله اتعطلت ولجان لجله اتزينت
والحور لجله اتباشرت الوداع الوداع يا رسول الله

الله يساعد بو الحسن غسله ولفه بالكفن
وقلبه على فراقه يحن الوداع الوداع يا رسول الله

ذابت يويلي مهجته وانشر عليه اعمامته
واراه داخل حجرته الوداع الوداع يا رسول الله

روح النبي من فارقت ارض المدينه اتزلزت
ولصوات بالرنه علت الوداع الوداع يا رسول الله

الكل يهمل مدمعه يبجي او هو ايودعه
يلطم الهامه بفاجعه الوداع الوداع يا رسول الله

فاطم تنوح او تتحب والقلب منها منشعب
والدمع عالوجنة يصب الوداع الوداع يا رسول الله

وتصيح ذابت مهجتي عقب الأبـو وافجعتي
خلوني اهمل دمعتي الوداع الوداع يا رسول الله

السـبطين شافوا المصطفى امسجى او عينه امغمضه
وسفه على جدنا مضي الوداع الوداع يا رسول الله

هالنور منك ينطفئ وشخصك علينا يختفي
ونصير في شد وفي احزان كلها امللممه

* * *

في وداع النبي (ص) وأئمة البقيع

في وداعة الله يا رسول الله يختار
هاليوم بنسافر ابأذن الله الجبار
غصب علينا فراقكم علينا
حبكم شرفنا والعدو جاير علينا
ابعين البغيضه والحق قد نظر إلينا
واحنا انتمني انجيكم ابكل عام زوار
دمنا عجن حبكم وصرنا إلکم المحبين
انزوركم وعلى مصاييكم امعزين
فرحتنا عند اقبوركم يا آل ياسين
انزوركم واعلى الخدود الدمع نثار
يوم إلي يرجع بالسلامه قاصد أهله
يودعكم اودمعه على خده تهله
يسأل من الله يعود بأحابه ونسله
ويحصل شفاعتكم ويحضى برضى الغفار
يا سادتي ابكي عليكم كل حياتي
واطلب من البآري لجلکم في مماتي

يغفر خطيئاتي ويمحي سيئاتي
وانجى ابشفاعتكم وحب حيدر الكرار
ومن المصائب التي حلت عليكم
بالقتل والسم قطعوا امعاء حشاكم
الله يجازي من غصب أمك وابوكم
حتى القبور اتهدمت من قوم لشرار
والمشتكى الله على من هدم لقبور
ومن يمنع الشيعة ونسأهم تدخل لتزور
بالحسره نخفي قهرنا ما نقدر نشور
ونرجع الحسرتنا وقلبنا يلتهب نار

* * *

مصائب الزهراء (ع) بالنبي (ص)

الزهرا تون امن المصيبه وتصفج الراح
وتصيح عزى يا خلايق انقضى وراح
كل المصائب والبلا انصب عليه
من راح والينا الذي عشنا بفيه
نوره انطفى والدار من شخصه خليه
والخلق كلها اتموج بالضجه ولصياح
ولكون كله يرتجفمن هالفجيعة
لسلام بيه اتايد ونور الشريعة
لملاك من سابع سما تنزل مطيعه
وجبريل من اجله ينوح ابدمع سفاح
والمنبر والمحراب خالي من احياء
ليمن وقف كل الخلق اتصلي وياه
والدنيا كلها مو حشه بعيني بلياه
وانظر إلى الحسنين بعده بنوح وصياح
وحيدر جليس الدار او منه الدمع مثنور
ابقيد الوصيه امقيد او ما يقدر ايثور

وينظر ابصير الباب مني الضلع مكسور
ومني خذوا حقي وارثي بالغصب راح
قرآن الله والنبي إيقول ليهم
البضعه احفضوها وعترتي داروا عليهم
خالفوا قولك يا نبينا وروعوهم
وهجموا الدار اعلی الوديعه والحمل طاح
بالقهر عاشت عقب عينك يا نبينا
بيتامها متمرمره وثكلى وحزينه
ممنوعه حتى من البچا وسط المدينه
تنادي وتصرخ والدمع بالخذ سفاح

* * *

الفصل الثاني
في رثاء
فاطمة الزهراء (ع)

وصايا الزهراء (ع) للإمام علي (ع)

الزهرا توصي والمدامع تشبه السيل
وتقول أكفاني دحضروها بتعجيل
حيدر انا بوصيك دسمع للوصيه
لي عاينت جسمي امسجى بالمنيه
سكّت اولادي وزينب الحورا الزحيه
وداري اليتاما يا علي لي هود الليل
اتصبر على افراقي يبو النفس العطوفه
غسلني وحدك لأحد جسمي يشوفه
ماكو مثلي كسرو اضلوعه ابجوفه
اخاف وقت الغسل دمي يا علي يسيل
بالليل دفنوني ولا تحتاج للنور
ماريد قبري ينعرف ما بين القبور
وساوي اتراب القبر يا حيدر المبرور
واودعني الله وروح لولادي بتعجيل
ماريد لعدا وقت دفني يحضروني
حقي خذوه اوسقطوا مني جيني

حتى البچا من اجل ابوي امنعوني
وخارج البيت اطلعت ابجي ابظلمة الليل
يا ابو الحسن اوصيك بولادي يضر غام
في كل صباح اوكل مسيّه او قبل ما تنام
تزوج عقب عيني بزوجه تصير ليهم
أمامه بنت اختي ترى تعطف عليهم
نشف دمعهم يا علي ومسح على الهام
ولا تترك زيارتك قبري في أول الليل
اباموت عنهم آه واحزني عليهم
إلك وإلى اولادي أمامه نعم لكفيل
اتوضت اوجت إلى الصلاة تخفي الونه
اوصلت إومن عقب الصلاه جرتها وونه
والروح منها اطلعت أو صارت الرنه
واسما تناديهها ودمعها بالوجن سيل

* * *

في رثاء الزهراء (ع)

امتدت على مصلاها امتدت على مصلاها
والروح منها فارقت ولا احد وياها
اسما اجتها اتنادي بنت النبي الهادي
صاحت أبها كلميني بالعجل ذاب افادي
والكل من اولادج بسمك يجي ينادي
باقول ليهم دخلوا امكم على امصلاها
بالحال اجوا سبطينها وقلوبهم مرتاعه
كلمن ينادي يمه وفاتح إليها باعه
نادتهم اسما سكتوا بوكم يجي هالساعه
ودخلوا عليها وشافوا نامت على مصلاها
الله يساعد حيدر الكرار ويا عياله
من عاين الزهرا قضت مقدار او صف حاله
السبطين طاحوا اعلى الجسد ودموعهم هماله
وحيدر ينادي بالأسف ماتت على مصلاها
وزينب اجت محزونه عندها وتجري الدمعه
نوبن تضم اخوانها ونوبن عليها تنعى

ايتام عقبج ضعنا حلت علينا الفجعه
مقدار افارقها لجسد للقبر خذني اويها
غسل جسدها المرتضى والعين منه عبرى
حنّ وجذب وناته وزادت عليه الحسره
من عاين ضلوع البتوله ابطنها متكسر
وعيونها ملطومه وماتت على مصلاها
غسلها وخلوها فوق النعش ملفوفه
فوق وزينب عليها تتحب وكبدها ملهوفه
وحسين يمها والحسن دموعهم مدروفه
وفضه تنادي الزهرا ماتت على مصلاها
بس اربعة شالو النعش إلى القبر ودوها
وفي سواد الليل أخفوا قبرها ودفنوها
والمرتضى خايف عليها من العدا ينبشوها
ما قصر وا ضربوها وماتت على مصلاها

* * *

وداع الزهراء (ع) للحسن وحسين (ع)

الكون ييچي ويرتجف زايد ونيه
وبنت النبوة بالقهر مات حزينه
يا زهرا يا بنت الرسالة وقرة العين
يا صفوة الجبار يا ست النساء
شا قول لا جويسألوا عنك السبطين
امكم مريضه في مصلاها حزينه
دخلوا على الزهرا ودمع العين سفاح
والحسن يمها ايصيح يصفج ابراح على راح
ولحسن مفجوع القلب فوق الجسد طاح
يلطم على راسه ويها ادموع عينه
واعظم امصبيه من اجت زينب تنادي
ودخلت على الزهرا ومنها القلب صادي
وتصيح يمه شوفج ايذوب افادي
فوق لمصلى امدده وما تكلمينه
اولادچ يايمة حول جسمك كلميه
ييجوا على موتك ييمة سكتيه

ومن هو ييمه عقبچ ايداري عليهم
كلمن على فرقاك زايد في حنيه
وشبجت الزهرا على اليتاما بالأيادي
والكون يرتج والخلق كل من ينادي
فارقت روح ام الحسن بضعة الهادي
وصارت الرنه وتزلزت ارض المدينه

* * *

الفصل الثالث

في رثاء

الإمام علي (ع)

توجه الامام علي (ع) للجامع

من منزله حيدر طلع تسطع انواره
للجامع ايصلي وصعد فوق المناره
ادن على راس المناره ابظلمة الليل
محلا التشهد في لسانه مع التهليل
لملاك وياه كبرت والروح جبريل
والخلق من صوته اوتعت تسمع اذكاره
وقبل إلى المحرب يتمشى على هون
شاف الردي نايم وقله اجلس يملعون
اخفيت امر في ضميرك يرجف الكون
اضمرت قتلي عذبك ربي بناره
اضمرت قتلي وكل عدو يبلغ مراده
وانا سبب سيفك اموتن بالشهاده
وكل شيعي مخلص ينفطر لجلي افاده
والكون يرتج والفلك يوقف مداره
وسفه اجي المحراب وشرع في الإقامه
يصلي على هونه ويفصح في كلامه

إلاولى سجدها وذهب للأخرى بقيامه
وبن المراد عاجله بماضي بتاره
صابه على الهامه ووقع حيدر للتراب
وخضبه بذمه يا خلق وسطة المحراب
شدّ هامته بيده ولزمها داحي الباب
والدم صبغ عينه وعلى جسمه يتجارى
ليتك يا شيعي تشوف حيدر صعب المراس
في وسطة المحراب مرمي امعصب الراس
وجبريل ينادي بالسما ويلطم على الراس
حلت على الدين الفجيعة والإنكساره

* * *

في رثاء الامام علي (ع)

وقع حيدر بالثرى مخضوب من دم هامته
المشتكى الله من الرجس المرادي وضربته
بساع ماصك المرادي هامة الكرار طاح
بالمصلى وماجت السبع السما وجبريل صاح
انهدت اركان الديانة وبيرق الإسلام طاح
انصاب داخي باب خير آية الله وحجته
ضحت الاملاك كلها والسما رادت تميل
وطلعت العالم حيارى معلنه بصوت العويل
وصلوا الجامع وشافوا حيدر ابدمه غسيل
راسه امعصب ودمه سال وخضب شيبته
عاينوا يمه الحسن حسين ومحمد وقوف
والكل يصفى فوق راسه والدمع بالخد دروف
وهذا يلطم فوق صدره وهامته براح لكفوف
والحسن ييچي ويغسل دم ابوه ابدمعه
جامع الكفوفه امتلى الخلق ضجت بالنحيب
حين وصلوا عاينوا الكرار من دمه خضيب

الأرض ترجف ولينادي وشها المصاب العجيب
كيف حيدر وسطة المحراب شقوا هامته
هذا يسأل ياهو إلى غال حيدر بالسجود
صاح أبو الحسين حيدر غالني نسل اليهود
قوموا للبيت احملوني ابد للمحراب اعود
انقطع ظني من وصلي للمصلى وشوفته
إلى الجامع وإلى المنبر ماظن ليهم وصول
ضربت الطاغى براسي حالها حال مهول
حان حين وهذا وعد إلي وعدني به الرسول
امر لمقدر علي من الباري وحكمته

* * *

في ضربة المحراب

من طاح في محرابه من طاح في محراب
حيدر علي المرتضى صاحت عليه احبابه
راسه انفجر بالضربه والدم يجري منه
والناس كلها ضجت حول الجسد ملتمه
واولاده المفجوعه طاحوا عليه ابهمه
وجبريل ينادي في السما انصاب في محرابه
شالوه كل اولاده والناس لمت حوله
والكل يلطم راسه ومدامعه مهموله
وزينب تصيح وتسأل منها الذي يحملونه
قالوا ابوك المرتضى انصاب في محرابه
با الله دخبروني ابعجل يا ناس ذاب افادي
قالوا لها بن ملجم بالسيف صاب الهادي
جرّت الونه الحسره والدمع منها بادي
حسبي على بن ملجم صاب الولي ابمحرابه
قامت تجر حسرتها ودموعها تتجارى
الجن والانس اسلموا من صطوته وبتاره

وهالضربة الميشومه اشعلت قلبي ناره
واحسرتي واضيمني انصاب الوالي بمحرا به
مطروح فوق افراشه وكل الاطباء حوله
اما اثيره بن عمر صرح لهم في قوله
ما كوا دوا للمرتضى اعلاج لا تخلوا له
ضربة الطاغى فجرت مخه وسط محرا به
المرتضى يوصيهم سكتوا ولا داووني
الليله انا وياكم اودعكم إتودعوني
وباقى سواد الليله وقبل الفجر دفنوني
محلا شهاده بو الحسن حصلها فى محرا به

* * *

مرض الامام علي (ع)

مرمي على فراش المرض يجذب ونيه
ودمه على جسمه يتجاري من جبينه
والحسن يمه يعاينه ودمعه يتحدر
يصفق براحاته على ابيه يتحسر
ساعه بصدرة يسنده وفي وجهه ينظر
ولولاد كلها تتحب متحاوليه
صار البچا واصفرت اوجوه الهواشم
وكلمن على راسه وعلى الخدين لاطم
ولدموع سالت بالثرى ودبوا العمايم
وارتفعت الضجه من بناته وبنينه
وحسين حول المرتضى زايد نحييه
ويقول بويه ضربته صعبه وعجبيه
قولوا دوا يجبرها هالساعه اجيبه
ولا طيب او ينظر بضربة ولينا
جابوا الطبيب الحاذق بمجلس الكرار
وبس من نظر حيدر بقى باهت ومختار

ودموعه سالت والقلب بالحزن شب نار
ويقول جرح السيف ساطي وسامينه
يحچي وقلبه من الوجد والحزن محتاس
مايفيد فيها علاج هالضربه يا هالناس
سيف الرجس مسموم وحده فارع الراس
من هالجرح هيهات ما يلتم جبينه
فتح عيونه المرتضى وصاح تركوني
هالسيف الله والنبي بيه أوعدوني
يشق هامتي وملزوم باجر تفقدوني
وتشمت العدوان يا اولادي علينا

* * *

وفاة الامام علي (ع)

فارقت روح المرتضى واخفى ونيته
والحسن يمه مدده وغمض له عينه
ياهي مصيبه زلزلت سبع السماوات
وجبريل ينعى في السما ينادي علي مات
والخلق كلها تموج وارتفعت الضججات
الله يساعد زيب الحورا الحزينه
شالوا الى المغسل على كهف اليتاما
والكل يصرخ آه يا عزنا وحمانا
والشام كلها معيده واحنا بعزانا
ليت الخلق فداوك يا عزنا ولينا
ومن غسلوه نادى الحورا بصوت عالي
بتروح عنا آه يا عزي ودلالي
مقدار اعاين منزلك يا بوي خالي
واخاف من جور الدهر بعدك علينا
نادت حسن وحسين ومحمد وعباس
لعمامه وياالسيف شيلوها يهالناس

مقدار اعاينهم عقب صاحب النوماس
ليلى ونهاري بالبچا ثكلى حزينه
شالوا الجنازه وهللوا وارتفع لصياح
هذا يدك صدره وذا فوق الأرض طاح
والكل ينادي العز عنا قوض وراح
والناس تبچي بالحزن تنعى والينا

* * *

ملك الموت عند أمير المؤمنين (ع)

غمضت عينه المرتضى نور الدين وأخفى ونيه
وزينب على الهامه تصك بالكفين ثكلى
الخلق ضجت والملائك تنعاه تبكي وتنادي
يا من حمل سيف الفقار يميناه يا وصي الهادي
قلوبنا ذابت وراسك شفناه بالدم صادي
لجلك يا بويه سالت دموع العين تسفح علينا
الكون يرتج يا علي بالأحزان ودموعه تجري
ما تقعد وتسمع نجيب الأخوان يا تاج فخري
ياليتني قبلك يا عود الفرسان ينحفر قبري
ولا جان شفت الراس منك شطرين ومعصينه
قلبي بنار الحزن دامى ومجروح يا قرة العين
مقدار أعاين لك تون مطروح ومغمض العين
ومن بعد فقدك يا أبو وين انروح وافجة البين
انت العمد وانت الحمى وانت الدين وانت ولينا
لمصابك السبع الاراضى تنعاك ويا سماها
والرسل جملة والخلق والأملاك وانت حماها

يا من إلى الأفلاك ربك خلاك انت ضياها
مقدر ارى من بيتنا سهم البين ياخذ ولينا
حنّ وفتح عينه علي ونادها وانفجر دمّه
عندي خبر الله وحيبي طه انطاني علمه
لى روضة رب الخلق سواها وجسمي تضمه
قلها الامر الله وغمض للعين واخفى ونينه

* * *

خروج روح أمير المؤمنين (ع)

روح الوصي طلعت وحن الكون والدين واحبابه
ياللي تحب الدين والكرار عزي على مصابه
طلعت الروح الشريفه وحار من اجله الفلك
وطلعت العالم حيارى تبجي الجن والملك
الله يساعد قلب من بحفرتك بينزلك
قلبه بحزن دمعه يهل والكون يبجي على مصابه
ويل قلبي من على المغتسل خلوا جنازته
مدري يغسلون جسمه لو يغسلوا ضربته
والاولاد تنوح كلها مع اولاده ونسوته
غسلوا جسم المرتضى بالهون والراس وصوابه
ومن على المغتسل خلى جثته صاح الحسن
اسم الله يا بويه على جسمك يلفونه بكفن
وداعة الله يالابو بتروح وأنا بالحزن
وحسين ينحب والقلب محزون بدموع سچابه
وجت له الاولاد كلها تودعه وتهمل العين
والخلق كلها تنادي وارفع منها الحنين

وداعة الله يا علي المرتضى يا مشيد الدين
مصائبك ابكى جملة المسكون بدموع سچابه
وقبلت زينب تنادي والدمع منها جرى
فرجوا عن جسمه وخلوني اكلمه وانظره
ليت قبل تغسلونه جسمي يضمه الثرى
ولا اشوف داره مو حشه والكون مظلم ومحرا به
بويه إلكو مثله وشاع فضله في الملا
ترضى أنا عيش بعدك بالهضم ومرمله
أخاف دهري يخون بيه وانسبي في كربلا
خوفي العدا التجور وعليه يخون دهري واصحابه

* * *

الفصل الرابع
في رثاء
الإمام الحسن (ع)

خطاب الحسن (ع) لخيه الحسين (ع)

يقله او حر السم وسط القلب ملهوب
بالسم جعده قطعت قلبي بكل صوب
وغيرت لوني وأجرت ادموعي بخدي
وشبت نار بالحشاء وهيجت وجدي
مادري شفاعل تحرق ابها لسم جبدي
والله عداوه في قلب ها الكفر مرسوب
سمعوا كلامه اخوانه وقاموا ينوحون
لمن سمع نادى وخلاهم يسكتون
قلبي انفطر مقدار اعاينهم ينوحون
مقدار اعاين دمعهم بالخند مسكوب
مالي قوه يا لأخوا مالي قوه
قطعت جبدي يا لأخوه والله جعده العدو
والله يجويه جعده ما فيه مروه
لكن عليه ها الأمر بالوح مكتوب
ونته ينور العين قبرك برض لطفوف
جني ارك ابغير ناصر بين لصفوف

وخوك البطل عباس مرمي اولاله اكفوف
ولنصار كلها امصرعه والكون مقلوب

* * *

وصية الحسن للحسين (ع)

نادي الحسن يا حسين يا ضنوة الكرار
السم سرى بجسمي ودمي وصار ماصار
لكن يبعد اهل اهلي ابوصيك ابوصيه
احفظها ينور العين بعدي يا شفیه
ليمن حملتوا اجنازتي ومنعوا عليه
لا اندفن بجوار جدي النبي المختار
لي شفت جنازه يرشقوها بلسهام
لا اتثور من اجلي مع اخوانك يضر غام
اتصير فتنه ايموت فيه الخاص والعام
واصبر وخل الأمر للواحد القهار

يم الوديعه امك الزهرا ادفنوني
وكل شيعتي ايزورن قبري ويحضروني
ويبچون من عظم الرزيه ويندبونني
وفي كل وقت يحسين تقصدي الزوار
الله يعينك من بعد فرقاي يحسين
ليتام تبجي والحرم تلم الخدين
وأرض المدينه ابنزلله ولعدا امعيدين
وزينب على فراقه تصب الدمع مدرار
كل الهواشم بالمصاب إيساعدوها
نوب على امها ونوب أبوها ونوب اخوها
والناس لّله بالمصاب ايدوبوها
وحسين إسكت للحريم اصغار واكبار
واعظم مصيبه يوم ذاك الجسد خلوه
فوق النعش نادى الشهيد حسين ودعوه
ياولاد هاشم هالجسد للقبر شيعوه
ظهري انكسر من راح خي والعد وجار

دخلت زينب على الامام الحسن (ع)

دخلت الحورا على خوها تشوفه وتنظره
شافته امسجى على فراشه وچبده امفطره
صرخت اونادت ودمع العين بالوجنه يسبح
جسمك اتحل يخويه بالفرش مرمي طريق
شوفتك بالسم تلوج وتجذب الونه وتصيح
يا خليصي خبروني منهو غالك ويش جرى
قامت الحسره تلوج وشافت الطشت بلموم
تيقنت من چبد اخوها امقطعه ابهر لسموم
لطمت الهامه ونادت والقلب ممي هموم
وخرت الحسره على خوها ودمعها تنشره
والشهيد حسين من شاف الأخوا مسموم صاح
جذب حسراته وتزفر واصفح راح ابراح
وقع فوقه اقبله والدمع بالوجنت ساح
الشكوى الله يا عزيزي السم في جسمك سرى
شالبصر يا نور عيني خل اجبين لك طبيب
إعالجك من هالمرض وتقوم بالسرعه وتطيب

والحسن نادی یخویه وارتفع منه النحیب
ما یفید اعلاج فیّہ والچبد متفطره

الفصل الخامس
في رثاء
الإمام الحسين (ع)

الامام الحسين (ع) في دار الوليد

طب إلى دار الوليد عباس راعي الزنجرة
والهواشم تمشي حوله ولسيوف امشهره
والوليد ابشوفه مدهوش انزعج في جلسته
حين جاله حسين يمشي حايطينه اخوته
وبو الفضل چدام وانواره تشح من غرته
يصيح من يقتل اخويه حسين وعيني تنظره
من رفع صوته الوليد اعلى الشهيد ابزجره
والعدو مروان يقهر للشهيد وينهره
يقول هذي فرصتي في حسين خلني انحره
واترك اشبول الهواشم بالمصاب احيره
ومن سمع عباس نادى ومدمعه بخده يهل
ينادي من يقتل خويه حسين بن خير العمل
خل اروي مهندي من نحره الساع ابعجل
واترك العدوان كلها اقلوبها متمر مره
سيفي ايمناي وأنا بالفضل صاحب الزود
لو تجي من حسين رخصه الوليد ماله وجود

آنا شبل المرتضى حيدر على النخوه اجود
خل ارأويه الشجاعه والفخر في مخره
ماحلى عز الهواشم في خياله ومشيته
طلع من دار الوليد وحايطينه اخوته
ما حلاهم بالسلامه النور زاهي بعزته
والعشيره حايطينه ولسيوف امشهره
آه يا وسفي عليهم يوم طبوا كربلا
جاهدوا حتى تفانوا والحرير معوله
وقف ينخاهم أبو سجاد ودمعه يهمله
وعاين اجشهم على حر الصعيد امجزره
وقف ينخاهم يا فرساني ولا عنده نصير
مثل طير مكسر اجناحه ولا يقدر يطير
ينظر اخوانه هذا مطبر وهذا عفير
والحريرم اتنوح كلها والقلوب امفطره

في خروج الامام (ع) من المدينة

حسين شایل بخوته من ارض المدينة
والكل ينادي ويتحب زايد حنيه
ودع قبر جده النبي ودموعه تسيل
ونادی يا جدي بارتحل في ظلمة الليل
وياك ضمنني يا رسول الله بتعجيل
في روضتك ضمنني مع أمي الزحیه
نادی النبي في سفرتك علوم واسرار
وبقتلك اتنجي الشيعة من لظى النار
ومن بعد ذبحك يا عزيز تشعل النار
وسط الخيم والحرم تصرخ يا ولينا
وتفوز يا بني بالشهادة والسعاده
وجسمك على الرمضی یظل بلا وساده
والله يميز شيعتك من كل عباده
وكل واحد اتنور الولايه بين عينيه
يبيي السجاد روح الكربلا روح
خل الخلق طول الدهر لك في بجى ونوح

ولأزم يظل جسمك على التراب مطروح
وإخوتك وإنصارك على الغبرى رهنه
ولأزم حريمك تنسبي ما بين لنذال
فوق الهزل حسرى وراسك فوق عسال
ومخدراتك تدخل المجلس بلحبال
ويزيد فوق التخت ينظرها بعينه
قله عجل في وداعة الله الامر لله
باروح اودع للحسن وامى الزهراه
وباحج بيت الله عقب واجب العمره
وجان خلونا العدا نبقى بقينا

* * *

خروج الامام (ع) من مكة

مكة بأهله اترزلت وارتفع لصياح
من عزم يشيل السبط خامس الاشباح
نادى أبو فاضل ودمعه ابخده ايسيل
ركب حرمننا يا عزيزي وخلصنا انشيل
من مكة امسافر قبل ما يهود الليل
قبل العدو يهجم وصير اصياح ونياح
بنشيل خويه ا بكل جمعنا وكل حرمننا
خوفي نبات أوبالحرم ينسفك دمننا
وينهتك بيت الله ويتشتت شملنا
وتزلزل الدنيا اذا ابكره دمي ساح
الحجر لسعد والخطيم ايودع حسين
في وداعة الله يا عزيز الهاشميين
واما الصفا والمروه وجميع المسلمين
الكل يصرخ بالوداع ويصفق الراح
وساعة القشري حين جا محمد للوداع
ضمه لصدره ويل قلبي فاتح الباع

هذا يصيح وذاك يتمرغ على القاع
ومن الرجال ومن الحريم ارتفع لصياح
مقدار اعدد ضجة النسوة وليتام
هذا يدك صدره وهذا يلطم الهام
ويا الوداع اتشوف دمع العين سجام
وسط القلب فرقى الحبيب ايسوى اجراح
اسم الله على الشبان من عين المنيه
بس سافروا كلهم قاصدين الغاضريه
لعلام منشوره على روس الهاشميه
وحسين مثل البدر بين الغيم لو لاح
يساعد الله محمد بن الحنفيه
ولحسين والنسوة ورجاله بالسويه
كلهم مشوا وبقيت منازلهم خليه
وازيد بالوحشه ويصفق راح ابراح

* * *

وداع محمد لأخيه الحسين (ع)

محمد يجادب ونينه ويصفق براح لكفوف
لجل اخوه احسين وخوانه دمع عينه درف
مصيبتك اتزلزل الدنيا وسماها والفضا
بالغصب تطلع من مكه وحجك ما نقضى
الى الموقف محرمين الناس كلها مقوضه
قصد هاالعالم تحج وياك وتنوي للوقوف
الناس في الموقف تنادي بالدعاء وانته في وين
ما تقلي بالضعينه وين ناوي يا حسين
قال جدي قال لي ابطلعتي احي الدين
ولازم اوفي بالعهد إلى علي برض لطفوف
هناك في موقف برض الطف واقف بالدعا
وكل اولادي وخوتي بالتراب امصرعه
وكل حريمي واليتاما بالمصاب امروعه
وشيعتي للحشر تبجي والدمع منهم دروف
كلله يا سبط النبوه سلمت لله الامر
اودعك بالنوح وقضي بالبچا طول العمر

يعيني الله على فراقك ويطيني صبر
وانا ادري يا عضيدي تنذبح برض الطفوف
ودعه وودع خواته واخوته وكل الاهل
الكل يصيح أوداعة الله والدمع منه يهل
والضعينه اتحركت فيها الهواشم والبطل
ساقى الايتام برض الطف مقطوع لكفوف
ماحلا ديچ الضعينه منضمه بهل الشيم
حسين قدام الضعينه والبطل بيده العلم
والهوادج بالحرير املبسه وفيها الحرم
والمنيه تصيح نزلوا يا شباب ابرض لطفوف

* * *

مسير الحسين (ع) وخطابه للمنيه

يا منيه اتعودي بالله عن بدور الزمان
اشوفش اتحومين حول الضعن ماظن لش أمان
يا منيه بالله صدي عن الشبان ابعجل
من هتافش سال دمعي في وخلى في قلبي وجل
لا تبشري بالمصايب والقتل دمعي يهل
لا تهيجين الصوايح راقبي عالي الشان
المنيه تقول لازم هالشباب ابكربلا
تندبح وجسامهم تبقى رميه مزمله
والخيم بالنار حروقه وحريم مرملة
واليتاما تنوح وتتنخي ولا ليهم امان
صاح سبط المصطفى ودمعه على خده جرى
هالشهاده لي واهلي من الباري مقدره
تندبح وجسامنا تبقى رميه مجزره
يا منيه صدى عنا ذاب قلبي بلحزان
أنا بأمر الله ورسوله افدي الدين بدمي
حتى شيعتنا تشيد للقيامه مأتمني

والله يسري بقتلي مدرسه للعالمي
وينفتح باب الهدى للشيعه ويرتفع شان
وينحسر الجاحد للولايه ولا عنده عمل
ويظهر السرا الحقيقي يقول حي على العمل
ويفرح الشيعي بدمع الي على خدوده انهمل
وبرضى الجبار يأتيه الندى روح الجنان
انت يا شيعي بدينك بالولايه معتقد
عظمك ولحمك ودمك بحب حسين انعقد
والجزا يوم الذي ما ينفعك مال وولد
ينفعك الله ورسول الله وعلي راعي الشان
انچان انت في العمل صادق بحب المرتضى
زكي اعمالك ترى عنك الدنيا مقوضه
وذكر حسين انذبح ظامي ولاحد غمضه
تصير يوم الحشر بجواره مع حور الجنان

مصيبة الامام الحسين (ع)

يا هو مصاب الي بكاه الانس والجنان
قالوا مصاب حسين ذبحه رجّ لكوان
شيعة علي الكرار دايم في بكا ونوح
لجل الذي في كربلا عطشان مذبح
جسمه على الرمضا ورأسه بالقنا يلوح
وشبانه وانصاره على حرة التربان
يا حسين ياللي مآتمك في كل ساعه
ليل ونهار اتنوح من اجلك الشيعة
مصائبك عظيم وزلزل الأرض الوسيعة
والحور والولدان تبجي وسط الجنان
انظر بعينك بالبصيره الكون مرجوج
شيعة وسني يوم عاشر والعزايوج
كله سبب طيحه ولينا من على الغوج
والخلق تبجي والفلك والكون عطلان
قال الشهيد حسين والمحتوم جاري
فدوى لدين المصطفى دمي الجاري

وتسبي حريمي وتذبح جملة انصاري
تبقى جثهم بالثرى من غير دفان
هذا القتل ليه انكتب بالقلم في اللوح
ويفوز من يلطم علي ولجلي ينوح
وجدي النبي وامي الزهرا والنبي نوح
وتبجي الرسل واهل السما والانس والجان
ويوم الحشر لين أوقفت جثه بلا راس
املاك تبجي لي وتبجي جملة الناس
وينتقم الله لي من العدوان لرجاس
والشيعة تفوز بكرامه وتدخل وتدخل جنان

* * *

سير الحسين (ع) إلى كربلا

الشبان حفت بالظعن والقصد لاوين
يا ماحلا الرايات والأعلام صوبين
يا محلا ديچ الهوادج في شكلها
أبدأ ما شفنا في الزمن زينة مثلها
فيها الفواطم والغرب ما تنظر إلهها
وقدامها نور النبوه بو علي حسين
يا حي ابو فاضل يحامي للظعينه
يفتر عليها وشاهر السيف بيمينه
وكل الفواطم تتخي به يا ولينه
فالك عسى فال يا ضيا العين
اني خايفه من هالسفر اعلى النشامه
وقلبي مهو باني عليهم بالسلامه
واخاف نواصل كربلا ونصير أياما
ونصبح بلا كافل ولا حامى ولا معين
قلها أبو فاضل ريب الشرف والزود
زينب يخيه طلبى البارى المعبود

ابقى إيش سالم وتسلم لي هالزنود
وتبقين في خدرش وعزش والنساوين
صاحت أنا ماخاف بوجدك يا عباس
ماحد كفويوصل إلى خدري من الناس
خوفي إلى من قطعوا الكفين والراس
تبقى طريح وينقتل حامي الحمى حسين
الله وكبر بالحرم طوح الحادي
وزينب تنادي هالسفر ذوب افادي
لن الشهيد حسين يصيح واقف جوادي
جيوا إلى غيره بسرع يا شياهين

* * *

الفصل السادس

في رثاء

مسلم ابن عفيف (ع)

مسلم ابن عقيل (ع) حاير في الكوفه

آه على مسلم وسط كوفان حاير
شوفته يجرونه يفطر للمراير
خايف ولا عنده أهل يسكن ولا دار
مغبون تجري دمعته بالسكك مختار
مفروود يمشي بوحدته ويدير لفكار
وسطة الكوفه عافته كل العشائر
كل من نظر له يحوم سد الباب عنه
وهذا يقول إلصاحبه إيتعد عنه
يم باب طوعه وقف يبكي ويجرونه
طلعت تنادي والقلب من اجله طائر
قالت من انت واقف على الباب هالساع
جالس اتفكر جلسة الخايف المرتاع
قلها انا مسلم واسمي في البلد شاع
خانت بي الكوفه وانا عطشان حاير
قالت الكوفه خانت بداحي لبواب
وسط الصلاة غالوه في داخل المحراب

و أنا اقولن مرحبا وفتح لك الباب
وطلب من الغفار علام السراير
انت يامسلم من نسب حيدر الكرار
فيك القداسه والعلم من نسل لطهار
لكن أسف خانوا البيعه قوم لشرار
والليل هود والعدو والعدو يطلبك جاير
اقبل الليل وجلجل اعليك بظلامه
وانت من اهل بيت النبوة والامامه
ادخل البيت ونطلب من الله السلامه
والجزا من الله والنبي بالحشر صاير

* * *

في رثاء مسلم ابن عقيل (ع)

مسلم برض كوفان حاير يحرونه
منهو الذي يوصل خبر لحسين عنه
خانت به الكوفه وبس يدير بالعين
مفروود ماله في البلد ناصر ولا معين
ييجي لنفسه لو لضعن الهاشمين
ماله صديق يرحمه ويكسب المنه
في دار طوعه مختفي والقلب محزون
زفره بشر زفره وهو جايع ومغبون
يعبد الباري والدمع يجري من لعيون
ياليت ابو السجاد يرجع للمدينه
جيش الذي بالعهد لك بايع إليه
اليوم والله مجتمع كله عليه
العدوان في وسط السكك ودور عليه
وبيت طوعه مختفي واجذب الونه
وفي اوداعة الله يابو طاهر يسردال
من جا صباح الله وهجمت قوم لنذال

ليهم برز كالصاعقه حللت بزلزال
فروا مابين ايديه والكل خاف منه
ابن لشعث ينادي ادركوني بجيش جرار
وصفوا إلى أبن زياد هالضيغم المغوار
وقالوا إله عمه علي حيدر الكرار
شجعان كلها تصرعت بالسف منه
قالوا عجل نحفر بيدانه حفيره
ونعطيه أمان الله في جو الظهره
وغطوا الحفيره ولا احد صارت به غيره
وهجموا عليه وسط الحفيره يضربونه
من وسطه الحفره طلعوه مكتوف ويصيح
الدم من جسمه بضرب الخنجر يسيح
بن زياد نادى في كلامه ابكل تصريح
سبحوه حتى تشتفي العدوان منه
يساعد طوعه الحره المصونه
من عاينت مسلم مكتوف يسحبونه
بسوق الغنم والناس كلهم يضربونه
ويش هالجنايه حتى جسمه يرمونه

رمي مسلم من أعلى القصر

يهل الشيم مسلم وقع وسط الحفيره
وهجموا عليه بسيوفهم وين العشيره
بن زياد نادى بالقصر صعدوه ورموه
ومكتوف بحباله على التربان سحبوه
خلوها فرجه جثته للناس ايشوفوه
وماحد من اهل البلد صارت بيه غيره
الله يساعدكم يا شيعه لو نظرتون
بالغصب مسلم صعدوه للقصر يرمون
ناس إلى الشام ويزيد راحو ييشرون
بعد القتل مسلم يسحبونه بكسيه
فوق وقت القتل مسلم ينادي
لا تقصد الكوفه يا شامة الهادي
خانوا البيعه واصبحوا كلهم اعادي
واهجموا عليّ بسيوفهم وسط الحفيره
بأعلى القصر صعدوه واعظمها فجيعة
ودبوه والعالم تزلزل والوسيعه

الله يساعدكم على مصابه يشيعه
وقلوب لمحبين لمصابه فطيره
وطوعه تنادي على السطح والقلب لهفان
من عاينت مسلم رمية بغير دفان
منهو الذي وصل خبر لولاد عدنان
مسلم يجهونه ويحفروا له حفيره

* * *

وصول خبر مسلم للحسين (ع)

خبر مسلم وصل الى حسين لكن حيره
زاد وجدده وزاد همه والدمع منه جرى
هو يرجع للمدينه لو يروح الكربلا
نادى بنت مسلم وجت له والمدامع هامله
قال يابنتي انا بوك وابو هالعائله
ومسح فوق الراس منها ولقلوب مفطره
حست الطفله بيتمها الجيب منها شقته
ونادت اخبرني يا خالي عن ابويه وجيته
اشوف ابويه طول الغيبه ولاهي عاده
وظنه نال الشهاده وحيد منهو يقبره
قال يابنتي الشهاده لي وجميع الشباب
يوم عاشر بالمحرم صرعى كلنا اعلى التراب
والخيم بالنار محروقه وحرمنا بلا حجاب
بغير والي ولا محامي في البراري مطشره
ودار عينه للهواشم يعلن بصوته ويصيح
ابن عمكم مسلم بكوفان مقتول وذبيح

لا غسل ولا كفن جسمه على الغبرى طريح
والأعادي يسحبوا جسمه على حرّ الثرى
ثارت اليوث الحرايب والشعور منشره
هذا يبجي وهذا يلطم والدموع منشره
ابد ما ترض المروه يظل جسمه على الثرى
لا حنوط ولا موارى يلم جسمه ويقبره

* * *

في رثاء أولاد مسلم

أولاد مسلم في سجنهم دمعهم دايم يسيل
لا احد يدخل عليهم لا نهار ولا بليل
يذوب قلب اللي يعاينهم يتامى بالسجن
واحد يجرونته وواحد اينوح ويون
صغار ماحد يباريهم ولا قلب يحن
ثنين في دار غربه مظلّم وهود الليل
خاطبوا السجان وقالوا له ودمع العين سال
احنا من بيت الرسول ارحمنا وفك هالأغلال
الدهر يتمنا وبقينا لا اهل ولا رجال
نموت في وسط السجن عندك ولا لينا كفيل
قال ليهم والدمع يهمي وعلى خده جرى
بالأمس مروا بحرايركم تنوح ميسره
وراس ياضي في الضيعينه الناس كلها تنظره
والعليل مقيد زونوده ودمع عينه يسيل
قالوا الراس الذي شفته على الذابل يلوح
يبهر العالم جماله وشوفته تشعب الروح

هذا راس حسين وحریمه على الهزل تنوح
ليتنا صرنا معاهم في السبا وياالعليل
قال ليهم يا يتامى امصابكم فت مهجتي
مقدر انظر ليكم اتنوحون تجري دمعتي
من السجن في الليل اطلعكم وافرغ ذمتي
يودعكم الله هالولد في البر لي هود الليل
واعظم مصيبه طلعهم للفضاء وعنهم رجع
اعمارهم في الثامنه ممليه بخوف وجزع
خافين ومايدلون الدرب بيها تلح
من المشي لاح الصباح ودمعهم يجري ويسيل

* * *

الفصل السابع

في رثاء

مصاب الحسين (ع)

بأرض كربلاء

وصول الحسين (ع) أرض كربلا

من وصل وادي كربلا سبط النبوه
تخير حصانه وللمشي ماويه قوه
كل الضعينه واقفه بقدرة الباري
وللرجال والنسوه دمعهم صار جاري
وحسين يسأل شالسبب تاهت افكاري
جيبوا فرس غيره يا أهل المروه
وكلما يجيبوا له مهر احسين يزجره
وسبعها ركبها بو علي وزادت الحسره
وحسين نادي شها لأرض قحله وقفره
بالله اخبروني شسمها زادت البلوى
قالوا يبو السجاد اسمها كثيره
محمد سكن فيها وتربتها عطيره
ولها اسامى مقدسه لكن خطيره
الغاضريه وكربلا يابن النبوه
ناس تسميها عراض الطف يا حسين
وناس يقول كربلا يابن الميامين

قلهم عجل هذي ارضنا يا شياهي
ننذبج والاجساد تبقى فوق غبره
نصبوا خيمنا ونزلوا النسوه يالمجاد
هذي الأرض بيها وعدني رب لعباد
أنا وحقوقي نذبج وجميع لولاد
ويتامنا تسبى مع العدوان قوه
إنچان هذي كربلا بيها الوعد حان
وطير المنيه يصيح وافجعة الشبان
لازم برضها نطل عرايا بغير دفان
كم طفل ميت بالعطش جسمه يتلوى
يا شيعه ذكروني لين شربتوا الماي
أنا الذبيح العطش فت حشاي ومعاي
محروم أنا واخوتي وجملة يتامي
حتى رضيعي بالسهم ذبحوه عنوه

* * *

نزول الحسين (ع) أرض كربلاء

من وصل شيخ العشيره إلكر بلا بهل الشيم
آمر العباس وأخوانه يتصبوا للخيم
ونزلت الشبان كلهم وانزلت كل الحرم
وزينب اتنادي شأسم هالأرض والمدمع يسيل
إنچان هذي كربلا شبانا راحت قتل
والجثث فوق الجثث تبقى رمية بلا غسل
والفواطم في السبا تركب على ظهور الهزل
شالبصر لو طوح الحادي ونادوا بالرحيل
إنچان هذي كربلا جتنا المصايب والبلا
أيتامنا تبقى بلا والي وحرمننا مرملة
والله يرحمنا مع العدوان في وسط الفلا
من يباري هاليتاما ومن يباري هالعليل
صرخت ونادت ودمع العين بالوجنه جرى
جان هذي كربلا خوفي اروح ميسره
وانظر اخواني جنايزهم على حر الثرى
والخيم بالنار محروقه ولا عندنا كفيل

اشلون امشي واخوتي كلهم جنايز بالعرى
اقعد أويا حسين لو امشي ذليله ميسره
والعدو بالغصب يا خذني ولاي مقدره
وبالغصب امشي مع العدوان في ظلمة الليل
الوعد في يوم عاشر صار وانخط بالقلم
بدم اخويه حسين واخوانه يشري للأمم
وكل أولاده وشبانه ويتاماه والحرم
لجل ناموس الديانه حسين ناداه الجليل
لكن احنا في حمالي راسه بالخطي يلوح
عينه تيري للضعينه وين تهيد وين تروح
ماكو بالعالم مثيله يقرى قرآن وينوح
والخلق من شوفته تسمع ومدمعها يسيل

* * *

معينة زينب (ع) للجيش

من عاينت زينب الجيش تحرك ودار
نادت ودمع العين فوق الخد نثار
هاالجيش هالي مجتمع قولوا إليه
ما ينحصى طبق فيافي الغاضريه
لين اجتمع لو هو عليا يا شفيه
قلها الشهيد حسين ودمع العين نثار
كله يخيه الجيش متجمع علينا
صاحت عجل الكافي الله احنا انسينا
يا خوي ردنا بالسلامه للمدينه
بعدك يخويه نخاف من وليه الاشرار
قلها يا خيه الجيش ما يحصى بتعداد
وبعينش تشوفي الصبح ملزوم يزداد
صاحت ودمع العين فوق الخد بداد
اراي الجيش يترادف علينا ليل ونهار
حلّق علينا الجيش باليمنه وليسار
وانته يخويه لاعدد عندك ولانصار

اخاف العدو يفني لاهلي صغار وكبار
وبقى مع النسوان في ولية الكفار
قلها يزنب هالحجي مكتوب بالوح
كل هالشباب بلا غسل بلقاع مطروح
و أنا معاهم فوق حرّ الترب مذبوح
كلنا عرايا تنظرينا فوق لوعار
صاحت عجل يا حسين من وصيت بينا
قلها العليل اليّ قبالش تنظرينه
ولازم على العسال راسي تنظرينه
وانتين والنسوه حواسر فوق لكوار

* * *

سؤال الانصار عن هذه الأرض

يا حسين ليش احنا بهذا البر سkena
لا فيه سكن ولا احد يجتاز منه
قلهم ودمعته على حدوده جريه
من عالم الذر هاالأرض مكتوبه ليّه
انقتل أنا واخوتي وولدي سويه
وحریمنا تمشي بیسر ثکلی وحزینّه
هالبر لازم یعمر بدمي الجاري
ویصیر فیّه مدفني وجملة انصاري
ومن کل وادي وكل محل تعنی زواري
ویصیر مثل الکعبه قبری یقبلونه
هاالأرض مخصوصه إلی من جملة الناس
ولیه فخر بیها وشرف أوعز نوماس
ومغبوط زایرها وقلونه لی الراس
وجسمي بلا تکفین فیها یدفنونه
وتهبط لی الأملاك فی عز وجلاله
وتسجل الزایر مع أولاده وفعاله

ويرجع إلى بلاده بسلامه مع عياله
واعياله ترجع بالحزن وتجرّونه
والأنبياء كلها وكل العالم ينوح
من اجل دم إلى بهذا الأرض مسفوح
عاري ثلث أيام فوق الترب مطروح
وشيعتي بدمع العين جسمي يغسلونه
وكل المآثم بالأوادم ممتليه
رجال ونسا صبح وعصر في هالعزیه
يصرفون لجلي المال والدمعه جريه
والجزا من الله في القيامه يحصلونه

* * *

رسالة الحسين (ع) لحبيب

من نزل وادي كربلاء وحاطت به القوم
نادي ودمع العين فوق الخد مسجوم
جئوا إليّ قلم باسطرّ رساله
يروح بها مندوبي إلى راعي الجلاله
إلى احبيب راعي المرجله وراعي البساله
ويقول له يا حبيب بينا حاطت القوم
يا حبيب يائيّ نصرتك لنا قديمه
ومحبتك للمرتضى حيدر عظيمه
تدري بسبط المصطفى ويا حريمه
العدوان حاطت به وعنه الماي ملزوم
وانته إلك حظ وسعاده أبديه
موعود بيها من النبي خير البريه
اترك الدنيا وروح لرض الغاضريه
وانصر حبيب الله حبيب الدين هاليوم
المرسول من وصل أويلي وطرق للباب
زوجة حبيب الحره حسّت بنت لطياب

نادت صدق ظني لفي مرسول لحباب
هذي السعاده جت إلى بيتك يا چيدوم
من فضّ الرساله هملت العين
وبذمة الله على الشهاده وياك يا حسين
طلق الدنيا وباع نفسه فذي للدين
وزوجته تنادي يا حبيب انصر المظلوم
يا حبيب خذني وياك صار القلب ذائب
مقدار على فراقك وملاقي المصايب
اسبى مع زينب وواسي للغرايب
اليجري عليهم عليّ يجري يچيدوم

* * *

خروج حبيب لنصره

حبيب من كوفه تعنى قاصد حسين
وغلق ابواب البيت واهمل دمة العين
الى كربلا راغب وقصده للشهادة
يريد ينصر بو علي ويبلغ مراده
بجوار قبر احسين يحظى بالسعادة
وطلق لدنياته وحرime والبساتين
وقال للعبد الذي يسرج له الخيل
حر لوجه الله روح بظلمة الليل
وبسفرتي هذه ابنصر لبهايل
وهيهات يرجع للمنازل غايب البين
سالت دموع العبد وتزفر ونادى
لحسين خذني وياك احظى بالسعادة
وطلب من الباري افوزن بالشهادة
ونصر غريب الغاضريه بو علي حسين
سالت دموع احبيب وشال العبد وياه
وصل لعند حسين حي الله محياه

قام الشهيد حسين واخوانه تيلقاه
وتناول الرايه وقبّل حسين
وقلّه يبوسجاده نفسي لك هديه
ارجوك تقبل يا غريب الغاضيه
أبوك حيدر والحسن قالوا إليه
في الروضه قبري وياك يا نور المسلمين

* * *

وصول حبيب إلى كربلا

يا حي حبيب وجيته للغاضريه
سلم على حسين السبط نسل الزقيه
واحنى عليه اقبله ويجري للدموع
وعاين إلى الشبان كلها بقلب موجوع
وخاطب حبيب بن المصطفى بهداي وخضوع
وقله انا عبدك يا بن خير البريه
سلم على حسين الشفيه واهمل العين
وسلم على الشبان كلهم والنساوين
راد الشهاده وشرب كاسات المنيه
يا حسين مقدار انظرك ذايب افادي
انت وحریمك بالعطش بين الاعادي
ارخصني إلى الميدان يا شمعة الهادي
سبعين مره ليتني ألقى المنيه
ناولني الرايه يبو النفس الأبيه
اعليها اسمي في الحروب الأوليه
ويا النبي أويا علي خير البريه
ياليت في حروب الحسن جتني المنيه
واليوم وعدي بالشهاده يا بن لطياب

بامرك أجاهد واحتضي توسيد لتراب
خادمك في الدنيا وبعد الموت بواب
الي اجي زاير إلك يسلم عليه
هاليوم انا لازم اجاهد في حماكم
انا وجميع لنصار كلنا فذوه لكم
ويا ليت بعد القتل اجلس في عزاكم
واساعد المختار والزهره الزقيه
حيب ثار وثارت إليوث الحميه
وقالوا فذالك نندبح يا بن الزقيه
ونفنى قبل تنفى إليوث الهاشميه
صاح البطل عباس ماترضى الحميه
آنا واخواني ضحايا نصير چدام
ودري عقب ما ننقتل تحرق هالخيام
صاح الشهيد حسين يا خويه يا ضرغام
انتون والانصار في العركه سويه
وبقى عقبكم مالي محامي ولا معين
ويساعد الله حريمنا وسط الصياوين
تسيهم العدو واننوا أوآنا صرعى رميه

* * *

روئيت زينب (ع) للجيش

شافت العسكر واصبحت زينب شجيّه
ونادت اخوها حسين والعبره جريّه
من عاينت زينب الجيش احتاط صوبين
ضجت أويهاها اليتامى والنساوين
هاالجيش لينا لو علينا قول يا حسين
قلبي ارتجف وظلمت الدنيا عليه
قلبي تفر من الفجائع
واشوف هذا الجيش حايط بالشرائع
أخاف الشمّل يتشتت وتسبى الودائع
وتذبح اخواني والخيم تبقى خليه
إنچان هذا الجيش متجمع علينا
بالعجل يالوالي رجعنا المدينه
ولا تذبح الشبان وانتہ يا حمنا
وانظر بليا كفيل برض الغاضريه
قلها صبري يا مخدره المحتوم جاري
وسلمي الأمر لي قضي ربي الباري

أنذبح أنا واخوتي وجملة انصاري
وأجسادنا تبقى على الرمضى رميه
لازم يا زينب تركبين ظهور لجمال
ولازم تشوفينا ضحايا فوق لرمال
وراسي يخيه تنظرينه فوق عسال
وتركب على صدري خيول الاعوجيه
صاحت عجل في وداعة الله يا ضيا العين
من بعدكم منهو للنساوين يباري للنساوين
وختك ضعيفه وما لها كافل ولا معين
وكفيلنا مقيد على ظهر المطيه

* * *

خطاب الحسين (ع) للأنصار

ليلة عاشر من محرم جمعّ حسين
اخوانه والانصار كلهم والنساوين
نادى عليهم والدمع بالخذ نثار
هاليله كلنا ضيوف عند الحرم يا حرار
وباجر تصوير المعركة ويرتفع لنهار
واجسادنا تبقى بلا غسل وتكفين
ولي ايريد ايروح لهله بالسلامه
الليل جانا واسيل علينا ظلامه
وآنا الصبح مقتول ويسلبوا اليتامه
هذا الخبر معلوم من عالم التكوين
كلهم تناخوا والدمع يجري بلخدود
وقالوا له يابن المصطفى ياسر لوجود
ياليت احنا والخلق هالي بلوجود
فذواك وانت تصوير سالم والخواتين
يا حسين الله صيرك للدين حامي
انموت وياك بعطش والمائي طامي

وشيعتك طول الدهر تبكي بدمع هامي
نوح ولطم والكل ينادي في العزا حسين
المظلوم راواهم منازلهم وشافوا
ورغبوا الجنة وطلقوا الدنيا وعافوا
وصاروا ضحايا بكر بلا فذوى إلى حسين
وشحال العقيله واقفه تسمع حچيهم
طلعت تحن وتصيح واويلي عليهم
ايتام عندي ومنهو يتولى عليهم
وكلنا حريم ومالنا محامي ولا معين

* * *

توديع زينب (ع) لاختوها

زينب تنادي وداعة الله يا شياهين
الليله معي وباجر على الرمضا مطاعين
يهل الشيم في وداعة الله يا نشامه
انتوا معي الليله تحرسون اليتامه
وباجر على حر الثرى كلکم نيامه
وليتام حوالي تصيح كلها والنساوين
الليله بخدرنا وباجر نقاسي المصابيب
ونصير في ولية عدو ويا النوايب
ونشوفکم صرعى على حرّ الترايب
والخيم محروقه من القوم الملاعين
الليله بخدرنا في الخيم ياهل الحميه
وباجر يا خويه حسين من وصيت بيه
انزال معروفين كلهم بني اميّه
واحنا حريم ومالنا محامي ولا معين
الليله بحماکم والقلب بالخوف مرتاع
لخيام محروسه بحمى الشبان لسباع

وباچر اذا هجموا العدى وما عندي فزاع
وسلبوا احرمننا وحرقوا كل الصياوين
الليله بكرامتكم انام ومطمئين
لخوان من حول الخيم كلهم مسلحين
وباچر اذا حرقوا الخيم وانتو مطاعين
وين التجي يابو علي ويا النساوين
قلها صبري يا مخدره حيدر الكرار
عقب القتل والسلب تهجم قوم لشرار
إسلبونچ والیتاما صغار وكبار
وباري الیتاما على الهزل ویاالنساوين

* * *

مقارنه بين يحيى والحسين (ع)

الدنيا بمصايبها على اهل الشرف والدين
وخصوص الساده ادور والنبين
الأنبياء يعبدون الله ليل ونهار
ويحبون للناس الهدايه وترك لشرار
وأهل الظلم يردون كل الناس كفار
يعيشون في في الدنيا بلا مذهب ولا دين
والانبياء الي للخلق كلهم يوعظون
يحلوا حلال الله وحرامه لك يجرمون
والناس يبغضوهم ويكرهوهم أو يملون
ويعطوا الحاكم خبر عنه مهو زين
والانبياء كلهم على هالحال ماتوا
وفي نار نمرود النبي ابراهيم ألقوا
وبعض بجور الكفر وسط السجن فاتوا
وناس بقتل وصلب من ايدي الملائكين
ولا حد بمنشار العداوه يقتلونه
والنبي يحيى غصب جهراً يذبحونه

وبعد القتل جسمه مكتف يتركونه
والراس جابوه للداعي غصباً على الدين
ظل يضرب اسنانه بقضيب ابن اللعينه
ويقول هذا الحرّم أوحلّ علينا
شفينا قلبنا بقتله ورأسه يدينا
ماله ولد ولا اخو ولا له معين
وسفه على يحيى انذبح مظلوم عطشان
ذبحه مثل ذبح الشهيد حسين لهفان
لكن جسمه ما بقى للخيل ميدان
ولا له شباب اعلى الثرى صرعى مطاعين
ولا له خيم فيها الحرم محروقه بالنار
ولا له يتامى مطشره اصغار وكبار
وبعد السلب والنهب ساقوهم على اكوار
واكفيلهم فوق الجمل مغلول ليدين
ولاله حرم جابوهم المجلس هديه
بالحبل مكتوفين والدمعه جريه
من تصيح طفله قالوا هذي خارجيه
لا ترجموهم ما لهم مذهب ولا دين

العباس (ع) يطلب الرخصه

من رخص حسين البطل عباس للماي
نادى بعالي الصوت منهو يوقف حذاي
صول على العسكر وخلي الجيش شطرين
نوب يخلي الجيش يسره ونوب ايمين
قصده الشريعه يمللي جوده للنساوين
فرق الجيمان ورجع للخيم بالماي
هلهمت زينب من رجع عاس سالم
عطاها الجود وروت قلوب الفواطم
وشربت الانصار وجميع الهواشم
لكن الاعادي بالقهر صارو بلا رأي
بن سعد مللم للعساكر فيهم وصاح
حملوا عليه بزنا تكم وسيوف ورماح
لكن ابو فاضل على الميمون من لاح
فروا من الميدان ما حد وقف بحده
وصرخ فيهم صرخة المعروف حيدر
وغاص بوسطهم وانهزم عسكرهم وفر

وفترّ على الميمون وصاح الله واكبر
الجثث تتناثر ودمها سال كالماي
مقدّر أوصف حملته بسيفه اعلى لجنود
چنها زلازل لو مطر وبروق ورعود
سيفه يمينه والعلم والرمح والجود
وطب للشريعة وذكر لحسين ورمي الماي
يا نفس موتي ولا تشربي ماي لزال
وحسين اخويه بالعطش وجميع لطفال
ورجع لمخيم وحاطت بيه العدوان
والجود صابوه بسهم وتصيب الماي

* * *

العباس (ع) يطلب الرخصه للماء

عباس نادى حسين يا راعي الحميّه
ارخصني يبو السجاد اجيب الماي هيّه
نادى يا خويه والدمع يجري بلخدود
خويه درخصني اروح أو ملي الجود
ما يصير نهلك بالعطش والماي موجود
وكل الشرايع بالعسكر ممتليه
يا خويه رخصني اجيب الماي يا حسين
هلكت عطش اطفالنا ويالنساوين
هالجيش هالي اعلى الشرايع صار صوبين
الماي اجيبه لو جشهم عالوطيه
ونزل على الماي واجيه يا شفیه
وتدري أنا خوك البطل راعي الحميّه
قله الشهيد حسين ودموعه جريّه
تدري الأخو للموت ما يسلم بخيّه
قله يبو فاضل يا چيدوم السريه
مقدار اشوف خيامنا منك خليّه

والجيش يابن المرتضى يفتر عليه
يا تاج عزي ويا عزيز الهاشميه
موعود انا بنصرك من الكرار حيدر
اسقي عطاشى كربلا وافني العسكر
قله ييو فاضل على فرقاك مقدار
أخاف جنب المشرعه تبقى رميه
صاح البطل عباس هذا سيفي عندي
لازم اروي العايله واوفي بو عدي
والعذر لله وليك لين انقطع زندي
والماي ما عنه صبر يابن الزجيه

* * *

حملة العباس (ع) على القوم وبعد

من طبّ أبو فاضل العركه رجّ لكوان
الفرسان فرت واختلت حومة الميدان
وقلب يمين الجيش عاليسه خبصهم
وخلّى الجماجم بالثرى بعزمه حصدهم
فلهم نشرهم هزمهم بسيفه قتلهم
ويصيح أنا بن المرتضى فارس الفرسان
الجيش ما يثبت في الميدان ونهار
وكبرّ عليهم مثل تكبيرة الكرار
ونزل عذاب الله عليهم مثل لمطار
جشهم تطيح على الثرى ولدموم غدران
صولّ وبتاره يمينه وهو على الغوج
وصاح وخلّى الجيش من حملاته ايموج
ناس قضوا موتى وناس بروحها تلوج
والسيف ينثر للجثث وسطة الميدان
يا حي صولاته وبو السجاد لا يشوف
ينادي عسى تسلم ييو فاضل هالكفوف

وانت وأنا بالمعركة نفني هالصفوف
عقبك أنا باصير مفرد بين عدوان
والله اسف يا ابو الفضل تقطع اكفوفك
وسط المعاره وعيني تنظر لك تشوفك
فوق الترب طايح وسيفك ويا جودك
وبلعمد راسك ينفضح والدم غدران
بعدك ييو فاضل اصير بحال ميشوم
أنا وحيد وعيلتي ما بين هالقوم
منهو اليباري هالحرم بعد يا چيدوم
لكن شيدي الامر للواحد القهار
قله يا خويه حسين بلغهم سلامي
وخبرهم ابهاليوم هو آخر ايامي
وجنب الشريعه انذبح والماي طامي
وانت تظل أويا الحرم أولك اعوان

* * *

خطاب العباس لزینب (ع)

العباس وسط المعركة قطعوا اكفوفه
الله يساعد زينب الحورا العطوفه
نادى بضعيف الصوت زينب يا زحیه
قطعوا كفوفي وما إلى للخیم جیه
الزندیں قطعوها ودنت مني المنیه
مقدار اشیل السیف یاختي مالی اكفوف
یاختي یا زينب اعذري وقولي للیتام
عمکم كفوفه مقطعه والعزم مادام
الجود وماقدر أوصلکم للخیام
والسهم فی شب والدرب ما شوف
وحسین واقف بالخیم یصفق علی الراح
ییحی وینادی انکسر ظهري والأخو راح
بالعمد صابوا بو الفضل وتقطر وطاح
بالمشرعه جسمه ولا ادري وين لكفوف
وارخی عنان المهر قاصد للشریعه
شاف الأخو مرمي وزندینه قطيعه

والراس منه منفصح وشهالفجيعة
ولكفوف طاحت بالمعاره بين لصفوف
تخوصر على عضيده وجذب ونه وتحسر
وحط راسه بحجره وقبله بحزن يسعر
ومد طولہ بطولہ وصاح الله واكبر
انكب عليه ييكى ودمع مدروف
غمض عيونہ وصاح خيه أوداعه الله
بالترب مرمي وانقطع وصل الأخوه
من عقب عينك يا عزيزي يخلف الله
مثلك اخو بالخلق وافي ابد ما شوف
ابوحدثه جا للخيم ويصعد انفاس
واقبلت زينب تسئله في وين عباس
قلها على المسناة فضخوا منه الراس
صرخت وهي تلطم على الهامه بلكفوف

* * *

القاسم يطلب الرخصه

من عاين الجاسم عمه حسين مفرد
نادي ودمع العين يجري فوق لحدود
يا عم أنا ما ريد هالدينيا وحياتي
اخاف السعاده تفوتني من دون أخوتي
وها لأرض هذي كربلا وفيها مماتي
هالعوده خذها يا عمي من صاحب الجود
اخوك الحسن وصاني وهذي الوصيه
لي شفت عمك صار برض الغاضريه
عاود الرخصه وشرب كاسات المنيه
تفوز بالجّنه من الباري المعبود
من تناول العوده حسين اهملت عينه
وطبّ لعند زينب لازم الشاب بيمينه
يا اختي نريد نزوج الجاسم سكينه
من الله ومن خويه الحسن هالأمر مقصود
زينب ياخيّه لبسي سكنه للزواج
ومن عقب ساعه خضبيها بفيض لأوداج

صاحت الجاسم ما بلغ مبحان لزواج
صغير وعمّه على النهر عباس ممدود
كيف العرس وحریمنا کلها نوايح
وشبان کلها على الغرا ذبايح
وخويه البطل راسه بعمد مفضوح طايح
واعظم مصيبه وحدثك ما بين الجنود
لبس المظلوم الولد جاسم ثيابه
وجابه إلى العرکه ينخي له احبابه
قوموا وزفوا شاب ما تهني بشبابه
هذا أخوكم وانا حاير بين بين الجنود
عود من العرکه ومحد لا نهض وياه
يهمل دموعه ولازم الجاسم بيمناه
تكسر الخاطر وحدثه ياليت فدواه
كل الخلق لحسين وهو غاية المقصود

* * *

زواج القاسم ابن الحسن (ع)

هانت ايامك يا جاسم لا تعرس يا شباب
لا تجيوا ثياب عرسه ولا تجيوا له خضاب
حس لمنادي ينادي في السما بمصيته
جاسم العريس صار ايوم عرسه ذبحته
صارت العرکه عروسه وسكنه ترقب جيته
ثلث عشر سنه ووجهه كالقمر بين السحاب
عمامته الخضره على راسه من ثياب الحسن
والشهيد حسين فصلها عليه مثل الكفن
الى الجاسم هالعلامه تذكر طول الزمن
ابد ما شفنا معرس والكفن خضر الثياب
يا معرس آخر ازواجك ترى ذاب الفؤاد
ما يصير ازواج والشبان صرعى على الوهاد
والمنيه تصيح يا سكينه البسي ثوب الحداد
في ولدكم عزوا زينب ويا رمله يا رباب
يا منيه صدي ابعينچ عن الجاسم الشاب
مقدر انظر له معرس يتعفر فوق لتراب

شوفي أمّه تتحب وتصيح ما بين لطناب
والوداع من الفواطم كلها تصرخ يا شباب
للزفاف أمهيئنه لو هو يمشي المصرعه
عمه وزينب ورمله والحرم متجمعه
وجملة النسوان كلها هلهمت وتودعه
وسكنه تنادي على العريس مني الراس شاب
من برز شبل الحسن جنبه قمر في مطلعته
فتح باعه حسين وضمه وقبله وودعه
ونادي الجاسم يا زينب الساعه ماشي المصرعه
شاب ما تنهني ابشابه استعدوا للمصاب
ودعّ المظلوم عمه والدمع منه يخر
طلعت امن الخيم رمله والقلب منها انفطر
تصيح يا بني أوداعة الله آه يا كصيف العمر
الملتقى وينه عقب هالساعه يا حلو الشباب
من لبس درعه وسيفه وصار قاصد للعهده
صوّل اعليهم وافنى اجموعهم بمهنده
وخلّى الشجعان كلها اعلى الصعيد امدده
وللأسف شسع النعال انحنى ابعده في الركاب

* * *

شجاعة القاسم في الميدان

شبل الحسن جاسم برز للمعركة وصال
وارتج وادي كربلا وحل بيه زلزال
صال وسط فيهم وصولاته عنيفه
بثياب عرسه وشرف والعز حليفه
فرسان جدلها على الغبرا بسيف
وخلى جشهم بالثري صرعى بالرمال
من لاح عالمين خلى الجيش شطرين
نوب على اليسر يكرّ ونوب ليمين
ينادي أنا ابن المرتضى قاتل العمرين
لازم اروّي كربلا من دموم لبطل
اجاهد عن المظلوم عمي وحدي
وارضي الباري وارضي المختار جدي
عذري إليمن صار فوق الترب خدي
وجسمي يظل فوق الثرى معفر بالرمال
لفّ ونشر جيش العدى وقحم جواده
وجدلّ الفرسان وبلغ فيهم مراده

قصده يواسي حسين عمه بالشهادة
وجسمه على الرمضا يظل ابغير بشيال
ما بين ماهو بالمعاره بين لصفوف
وقلبه ياويلي من لهيب العطش ملهوف
والقوم من كل جانب إبزانات وسيف
وكثرة اجراحاته ودمه على الجسد سال
وضعت يويلي قوته أو عزمه إنهار
وشسع النعال انقطع بالميدان وحتار
وعاجله بالضربه الشامي بسيف بتار
واتقنطر من الميمون يشكي العمه الحال
إدركني يا عمي طحت في وسط المعاره
وجاه الشهيد حسين ودموعه اتجارى
للخيم جابه يصيح في ذل وانكساره
جسمك مينشال اعلى صدري بغير شيال

* * *

مصرع القاسم ابن الحسن (ع)

من وقع بالميدان عريس الهواشم
انزف دمه وصار فوق الترب نايم
مقدار أوصف حالة المظلوم من لاح
جاسم من الميمون وسط المعركة طاح
بالعجل جاله حسين يصفق راح براح
ضمه ب صدره وصاح يا ضوة المسموم
من وقع من مهره نادى بعمه حسين
إدركني يا عمي وجيبيني عند النساوين
وبصف اخوتي جيبيني ويا المطاعين
وياهم بحفره مع كل الهواشم
ودني لأمي من قبل ما تطلع الروح
اضمد اصوابات الجسد وداوي لجروح
وشاله على صدره للخيم والدمع مسفوح
ومده ما بين الخيم ويا الهواشم
الله يساعد زينب ورمله الحزينه
ويساعد النسوان وياهم اسكينه

من شافوا العريس جسمه مقطعينه
تلموا على جسمه ودمع العين ساجم
ومقدار أوصف حال سكنه يوم شافت
جاسم على التربان منه الروح راحت
وزينب على جسمه أوقفت في الحال طاحت
ولموا على جسمه يودعونه الفواطم
ورمله تنادي والدمع يجري بالحدود
من شافته بثوب العرس بالقاع محدود
وسكنه تنادي لبستني ثياب الحدود
مقدار أعاين جسمك مخضب بدموم

* * *

علي الاكبر يطلب الماء من أبيه

شمعة بني هاشم شبه أحمد المختار
ينادي يبويه من العطش قلبي إلهب نار
يا بوي قلبي ذاب من حومة الميدان
جوع وعطش وطراد وملاقى العدوان
لو احصل الماي الذي يروي الضمان
إنجان اطشر هالأعادي يمين ويسار
واحمل على العسكر وخلي يصير زلزال
وقلب يمين الجيش وخلطها الشمال
وروي اراضى كربلا من دموم لبطل
جدّي عليّ المرتضى حيدر الكرار
وبتشوف عينك كيف اخليهم مذابيح
وفي الشام والكوفه اخلي الصايح إيصيح
قله ابوه حسين ودمعه ابخده يسبح
يا نور عيني يا شبيه أحمد المختار
واحنى عليه اقبله وضمه ابصدره
وخلى الخاتم في فمه وشمّ نحره

وطلعت ليلي تنظره وتجذب الحسره
وزينب تعالين له ودمع العين نثار
حسين نادى وصار يكثر من وداعه
ومن التعب والعطش تروى عقب ساعه
وتوصل لحيدر والنبى راعي الشفاعة
وابقى انا حاير يا عقلي بين لشرار
ودعّ يلکبر عمتك ويا الفواطم
ما اظن من الحمله يعقلي تعود سالم
الله يعينك لبرز بكر ابن غانم
ذكرني الحملات جدك حامي الجار

شجاعة علي الأكبر (ع)

من برز للميدان شبل حسين لكبر
ماجت اراضي كربلا وفرت العسكر
صول على الجيمان وزلزلهم بزلزال
خلي الجثث والروس تتناثر بلرمال
الكون رجه بصولته واذهل الابطال
وانهزمت الشجعان كلها وراحت تفرّ
من نزل للميدان شق الجيش شطرين
وذكرهم بحملات حيدر يوم صفين
وحسين واقف بالخيم شابح له العين
وليلى بالمخيم دمعها عليه ينثر
تتلهف وتسأل من الباري المعبود
وتنادي عسى للخيم سالم لكبر يعود
وتجذب الحسره والدمع يجري بلخدود
وحسين واقف بالخيم للولد ينظر
بكر ابن غانم جاب لكبر راسه ولاح
واقبل لبوه حسين وضمه ب صدره وصاح

الجائزہ امیہ العطش فت قلبي أورا ح
قلہ الشہید حسین یابنی ساعہ اصبر
واتروح للجنہ وتروی من الکوثر
وتلقى النبی المختار والکرار حیدر
وامک بخیمتها قلبها بحزن یسعر
سلم أودعها وادع فراق لکبر
من جاء إلى امه ورآها تدعي له
نشرت شعرها ودمعها بخدها تسيله
عسى يرجع الاکبر بحق الله ورسوله
وبغربة حسین الوحید وجاه حیدر

* * *

صولات الاكبر في الميدان

من برز لكبر الى العرکه بعزمه وهمته
نبض عرق الهاشمي ونوره يشع من غرته
صاح انا شبل الشهيد حسين جدي المرتضى
ساقى الكوثر شفيح الناس في يوم اللضى
الي يقرب عندي روحه للمنيه معرضه
واليّ يرجع راسه بسيفي يطيح بضربته
صولّ وماجت اراضي كربلا وصاحت القوم
حيدر الكرار جانا من النجف هذا اليوم
جدل الشجعان بالعرکه وملاها بالدموم
وخلّى طير الموت فوق الروس يرفرف جناحه
من العطش ظامي قلبيه والچبد متفطره
والشهيد حسين واقف بالمخيم ينظره
والأعادي تريد قتله والسيوف مشهره
لكن العدو ان فرت يوم صمم حملته
صاح بويه العطش انحل قوتي وفتت احشاي
لفني الجيمان كلها بويه لو احصل الماي

قله يا فلك النجابه طلبتك ما تحصل هاي
وضم المدلل ابصدره وغصب هلت عبرته
قله اتصبر يا بعد أهلي وتروى بالمعين
تروح للجنه وتسقى بكف أمير المؤمنين
وأنا عقبك ابقى محير ولا عند معين
لا أخو ولا ولد عند يشور بهمته

مصرع علي الاكبر (ع)

صاح المنادي بلكبر وسطة الميدان طاح
والشهيد حسين ينادي راح مني الولد راح
وصل للعركه وشاف الولد في دمه غسيل
جذب حسراته وتزفر والدمع وتزفر منه يسيل
نور عيني يا الولد مالك شبيه ولا مثيل
وانحنى فوق يشمه والدمع بالوجن ساح
امتد على جسم المدلل يعلم الله بحالته
شوفته تكسر الخاطر بين لعدا ابوحدثه
صاح يابني على الدنيا العفا وزادت حسرته
تخير بشيله للمخيم وظل يصفق الراح
الجسد ما ينشال وجروحه تسيل مقطعه
ولفة ابرده ولم أوصال جسمه جمعه
وشاله بصدره للمخيم ويجري مدمعه
ومدده بين الخيم والحرم ضجت بالصياح
وطلعت ليلي من الخيمه تنادي يا علي
يا المدلل عقب عينك ابقى حرمة بلا ولي

من يرجعني المدينه ومن يعدل محملي
ومن يركبني الهودج في المسيه والصبح
يابني اتمنيت انا قبلك تشل جنازتي
وتحضر اجهازي يا بعد أهلي وتدفن جثتي
خان بي دهري وصرت بعدك اقاصي غربتي
لا كفيل ولا محامي لي حدى الحادي وصاح
واقبلت زينب تنعي الولد في بردته
وانحنت فوقه تشمه وتلثمه في وجته
يا شباب انقص عمره ومات ظامي بحسرتة
قمر ما كمل ثمتعشر سنه عمره وراح

* * *

وقوف الحسين (ع) على مصرع الاكبر

الله يعين حسين في ملاقى المصايب
من عاين الاكبر معفر بالترايب
احنى عليه وشاله بدمه للخيام
بيچي ويجذب حسرتة والدمع سجام
ياليت عمري قبل عمرك صار بأيام
ولا اشوفك موسد على الترايب
جسمي انتحل وشاب راسي من مصابك
وبعدك إلى العشرين ما وصل شبابك
للخيم باوديك وتودعك احبابك
وما ينحمل جسمك موزع بالحرايب
بالبرده لفه ويل قلبي وللخيم عاد
بيچي على وليده وقبله بحزن وبيها
واقبلت زينب صارخه الحزن زاد
نادت يا خويه اشهالفجائع النوايب
وليلي من الخيمه طلعت تلطم صدرها
شافت النسوه بالحزن جزت شعرها

اتصيح هالبرده دكشفوا لي خبرها
عيني انعمت والراس مني صار شايب
طاحت على جسمه ومنها القلب مجروح
وشافت ولدها جسمه امقطع بلا روح
صاحت يا عقلي عقب عينك وين انا روح
امرمره ومقدار على ظهور الركائب

* * *

الحسين (ع) ينعى أهل بيته والأَنْصار

من وقف سبط النبي ينخي انصاره وعزوته
صاح يا رجال الحميه وغصب هلت عبرته
عاين الاجساد كلها مطرحه فوق لتراب
وقف ينخاهم بأسماءهم ولا يحصل جواب
يا لبطل عباس انهض شوفني بين لجناب
ما ظن ترضى اخوك حسين يبقى بوحدته
قوم يا سور العذارى وانظر إلك وحيد
بين لعدى ما إله ناصر ولا عنده عضيد
الجيش متلملم عليه بالسيف وبالحديد
والحرم تبجي وعلي السجاد تفجع ونته
نوب ينظر للحريم ونوب للعسكر يشوف
وحيد ما عنده محامي إلتفت عليه الصفوف
والحرم في داخل الخيمه ومدامعهم دروف
بس علي السجاد ينعى المرض ناكل قوته
ياليوث الحرب يا جاسم يا لكبر يا شباب
انيام انتوا اشكر انخاكم ولا حصل جواب

انهضوا وشوفوا الحرم مروعه وسط لطباب
وانا حاير مثل طير الي مكسر جناحه
يفجع العالم وقوف حسين بالعركه وحيد
ولنصار مصرعه كلها على حرّ الصعيد
والحريم تصيح وتنادي وتهتف بالعميد
خل يجينا تودعه جملة حريمه وعيلته
وعرج المظلوم للنسوان ينادي بالوداع
ساعة الكشره عليهم عقبها ماكو اجتماع
واقبلت زينب تنادي والقلب منها ارتاع
ولت اعلى حسين للتوديع جملة عيلته

* * *

الحسين (ع) ينخى أخوته وأنصاره

حسين واقف بالمعاره بين لصفوف
ينخى أولاده وأخوته والدمع مدروف
ينادي برفيع الصوت ياليوث الحريه
يا شبال عبد المطلب يا نور طيبه
تدرون انا مفروود في اكبر مصيبه
ما عندي محامي وحريمي بدمع مدروف
قعدوا يا فرسان الحرايب عاينوني
واقف انخيكم وكلكم تسمعوني
اموات رحتوا للجنان وتتركوني
ابچي عليكم والدمع بالخد مدروف
نادى أبو فاضل ويمّه سعد انفاس
دقعد وعاین وحدتي ما بين لرجاس
وعاین حرمنا في الخيم تلطم على الراس
تنعى على الشبان صرعى برض لطفوف
وراح للجاسم ينادي بقلب لهفان
دقعد يامن ثوب العرس صارت له اكفان

عَمَّكَ بَقَى بِالذَّلِّ حَايِرٌ بَيْنَ عَدَوَانٍ
وَأَمَّكَ عَلَى الْهَامَةِ تَصَكُّ بِرَاحٍ لِكُفُوفٍ
بُوحْدِهِ يَدُورُ فِي الْمَعَارِهِ شِمَالٌ وَيَمِينٌ
يُنَادِي عَلَى لَكْبَرٍ عَلِيٍّ يَا قِرَّةَ الْعَيْنِ
بَاخْبِرْكَ عَنْ حَالِ لَيْلَى النَّسَاوِينِ
كُلَّهُمْ فَرَدَّ ضُجْجُهُ عَلَيْكَ بِقَلْبٍ مَلْهُوفٍ
ظَلٌّ يَنْتَخِي رُكْنَ الدِّيَانَةِ وَسِرٌّ لَوْ جُودٍ
ضُئُوءُ الْهَادِي وَصَفُوءُ الْبَارِي الْمَعْبُودِ
مَا حُدَّ بَقَى يَسْرُجُ جَوَادِي صَرَّتْ مَفْرُودِ
شَالِبَصْرٍ وَالْعَدَوَانِ لِيهِ اصْطَفَتْ صَفُوفِ

* * *

الحسين (ع) يخاطب نفسه

ظل الشهيد حسين بين القوم حائر
نوب يعاين وحدته ونوب الحراير
حائر ويجذب ونته ويدير بالعين
يتلهف ويجذب الحسره وماله معين
نوب يعاين للمخيم ونوب للنساوين
ونوب على العدوان حاطت بالحراير
مفروود والله حالته تكسر الخاطر
ينادي برفيع الصوت هل من لي ناصر
ومنهو عقب عيني يباري للحراير
من بعد السلب تبقى حرما بغير ساتر
واقف يدير العين في العرکه بلا انصار
يبيحي على فراق الاهل ويدير افكار
وخايف على خيام النسا يحرقوها بالنار
والحرم تبقى بلا ولي والعدو جاير
فوضت امري للعلي الواحد الجبار
وإلى النبي المصطفى أحرم المختار

وإلى علي المرتضى حيدر الكرار
قتلي وسبي اهلي فدى للدين
الحمد لله والذي باللوح يجري
بقتلي وولدي واخوتي وبحزّ نحري
النسوان تسبى والأعوجيه تدوس صدري
قتلي ينجي شيعتي ولدين جابر
ومني سلام الله عليكم يا محبين
تدرون جسمي يظل رميه بغير تكفين
وراسي على العسال يمشي والنساوين
وبيني وبين الله وعد واليوم عاشر

* * *

مخاطبة الدين إلى الامام الحسين (ع)

الدين ينادي حسين يا نور الشريعة
يا حمي الاسلام يا منجي الشيعة
منك أريد علاج يا حجة المعبود
ودوائي ما يحصل في العالم الموجود
ولك التجي ونخاك يا غاية المقصود
أبرى من الأمراض وجروحي الوسيعة
قله اصطر يا دين جدي ودين لسلام
اشفيك من نحري ونحري وتعفيري بالرغام
وبقتل أولادي وسبي اهلي وليتام
وقتل أخوتي ونصار وتسليب الوديعه
اشفيك من هذا المرض يا دين جدي
بقتلي واخواني وانصاري وولدي
ومالك علاج في البريه غير عندي
نصب المآتم في الملا تحي الشريعة
بقتلي وعظ ورشاد كل الناس تحجي
وناس على الهامه اللطم وناس تبجي

والناس تقصدني ومن كل جانب اتجي
بقلوب ملهوفه تجي جملة الشيعة
والخلق كلها تموج في أيام عاشور
تقصد المآتم بالبواحي ولطم لصدور
يجازيهم الله والنبي الهادي المبرور
ويوم الحشر حيدر علي وزهره الشفيعة
الله جعلني للخلق رحمه وسيله
كلمن إلى المآتم يجي دمعه يسيله
ويجلس مع الزهراء وعلي راعي الفضيله
والله يغفر له ويجازيه بصنيعه
الانبياء ولملاك كلها اتنوح جلي
حتى سماوات العلى تهتز لقتلي
ماكو احد في الناس كلها انقتل مثلي
وسبي النساء فوق الهزل اكبر فجيعه

توديع الحسين (ع) للعائلة

ويلي على المظلوم بين الخيم مختار
ينثر دموعه ويشتكى قلة الأنصار
نوب يعاين للخيم الله يعينه
نوب على جيش الكفر ينظر بعينه
ونوب على الشبان في الغبرى رهينه
ونوب ينخي ويصفج اليمنه باليسار
ونوب يودع عيلته والدمع همال
ونوب على السجاد يوصي بحفظ لعال
ونوب على زينب اذا هجمت الأندال
وحرقوا الخيم باري الحريم صغار وكبار
يا ختي اباودعكم الله بالسلامه
اخبرچ إلى من طحت مهري بعلامه
الكون كله يموج والجو بظلامه
ولملاك تصرخ في السما والفلك يختار
ودع علي السجاد وضمه بوسط صدره
قله اصطبر يا بني لحكم الله وأمره

انت الحجه في الخلق وللكون سره
ودعتك الله واليتاما صغار وكبار
النسوان ضجت بالشهيد وداعة الله
لينا ولك الله يالولي ليا ولك الله
قلهم من العدوان ليكم يحفظ الله
ومنهو جوادي يقدمه وما عندي انصار
جت زينب تقود المهر أم المصايب
لكن قلبها من الحزن والنوح ذائب
تنادي الفرس يا خوي جبهه والنوايب
ماكو اخت جابت لخواها الفرس ما صار
قلها يا زينب في الخلق ما يحصل مثلى
لجنود هالي تجمععت تريد قتلى
وانت على البلوى إلى مصابي تحملى
نادت عجل في وداعة الباري الجبار

* * *

وصية الزهراء (ع) لزینب

أوصت الزهراء زینب الحورا الزجیه
وقالت یا بنتی لی نزلتوا الغاضریه
یا بنتی اذا عزم اخوش علی الشهاده
قبلیه عنی فی جبینیه وفی فؤاده
وسلمی علیه وانی اخبرش بالافاده
اول سهم فی الکبد یدعیها فریه
وثانی سهم یا مخدره فی وسط عینه
ویطیح مرمی ویفجع العالم ونینه
وتدرین عنه وما تقدری توصلیه
متممره بأیتام اخوش الهاشمیه
وساعه وداع حسین زینب طلعت تنوح
یا خوی عندی لك وصیه تشعب الروح
اقبلک اقبلک ونحرك المذبوح
هذی وصیه من امک الزهرا علیه
ادت وصیت امها وفتحت له الباع
وضمها بصدره وانتحب أوصار لوداع

واخشي على زينب ومنها القلب ارتاع
ونادت يا خويه مفارقك غصب علي
وحسين صال وجال في العرکه وينادي
بويه علي المرتضى وجدي الهادي
وخلی الجثث صرعى من جنود الأعداي
والكبد صارت من عطشها ملتظيه
ليتک يا شيعي تشوف وسط المعرکه حسين
ينخي وينادي ويستغيث وماله معين
والدم ينزف من جراحاته الصوبين
والعطش فت قلبه ودمومه جريه

* * *

خطبة الحسين (ع) في القوم

سرّ الوجود وصفوة الهادي المختار
دارت عليه جنود اميّه وظل مختار
بالخطبه قام يبلغ الجمع بكلامه
وقلهم انا من بيت النوه والأمامه
القران فينا انزله اكبر علامه
والله وصفنا بآية التطهير لطهار
قران الله والني واضح بيانه
جدي وبويه علي أهل الديانه
وآنا اعرفكم بدين الله وشانه
راجعوا حسبكم والنسب أن كنتوا احرار
وعرفهم بنفسه وصاح الله واكبر
ونادى أنا احسين السبط نجل الغضنفر
جدي النبي وأمي الزهرا وابوي حيدر
مايجوز قتلي وحرّم عند صغار وكبار
ياليتهم تركوه لطفاله وحريمه
ويش السبب قتله اشفاعل من جريمه

لنصار كلها اذبحت حتى فطيمه
مراقبوا الجبار في عترة المختار
عمامة رسول الله والبرده ولسلاح
تشوفونها عندي واريد أوياكم اصلاح
لا تمنون الماي اطفالي بالصياح
تدينون بالأسلام لو انتون كفار
قال الشمري يا حسين اسمك غير مشكور
امك الزهرا وجدك الهادي المبرور
تباع يزيد الآن وإلا السيف مشهور
نقتلك ونخلي الخيم محروقه بنار
وظل الشهيد حسين ينثر فيض لدموع
نوب يعاين للحريم ونوب لجموع
ويتلهف ويجذب الحسره بقلب موجوع
خايف على النسوان توليها الكفار

* * *

مقتل الطفل الرضيع

زينب تنادي حسين يا غاية المقصود
ابنك ونيه من العطش يفت لجبود
جابه ابوه حسين للعسكر ينادي
طفلي يلوج من العطش ذوب افادي
غارت عيونه من البچا والقلب صادي
الله وخلقه والملاك كلهم شهود
ماله جنايه يموت ظامي وسط حجري
مقمط إلولح رقبتة والمائي يجري
دالع لسانه من العطش في وسط صدري
ماحد منع للمائي إسلاماً ولا يهود
بن سعد نادي بحرمله اقطع هالنزاع
وعاين بياض إلي بنحر الطفل لماع
خل السهم في رقبتة وفطمه الساع
لا يرجع حسين الخيم والطفل موجود
وحرمله صابه بالسهم في وسط نحره
وفربرت روحه وما شرب للمائي قطره

ولفه أبوه حسين في بردته بصدرة
وللخيم جابه والدمع يجري بالحدود
طلعوا بنات حسين كلهم يلتقونه
يقولوا عسى خونا شرب والباقي لينا
قلهم أبو السجاد اخوكم ذابحينه
وفوضوا الأمر الله الواحد القهار
واما الرباب من الحزن طلعت كئيبه
تلطم على الهامه وعبرتها سكيه
تنادي الولد عني مضى من وين اجيبه
جنت ارجيه يعيش ليه وارج مفقود

* * *

إجتماع الجيوش على الحسين (ع)

بن سعد نادى بالعساكر بالسويه
حملوا فرد حمله على باقي البقيّه
حسين ظل مفروود لا ناصر ولا أعوان
قتلوه ومن بعد القتل سلبوا النسوان
وخلوه عاري على الثرى من غير اكفان
تلعب على صدره خيول الاعوجيه
من كل جهه إلتمت على المظلوم لصفوف
وداروا عليه بزاناتهم ورماح وسيوف
وحسين وحده بالمعاره وعينه تشوف
لنصار كلها مصرعه فوق الوطيه
نادى عليهم والدمع بالخذ جاري
سهم القضا بالموت فيكم صار جاري
ومالي محامي عن يميني وعن يساري
لحمل على العدوان حمله هاشميه
ومن برز خلى المعركه والجيش شطرين
وقلب اليمنه على اليسره وماله امعين

ومن كل جهه سيفه يناديهم انا حسين
سبط النبي وبويه علي وام وامي الزحّيه
سيفه يسوي بروق والميدان أحمر
والجيش كله يموج والهجمات تنشر
وانهزمت الفرسان وتضعضع العسكر
وفرت وسيف الموت يلحق بالمنيّه
لولا قضاء الله في حكّمته وشأنه
قتل الشهيد حسين تأييد الديانه
وبقتل انصاره وقتل جملة اخوانه
ما چان يبقی من بني أميّه بقيّه

* * *

مجي الجواد خالي بصهيله للخيم

اقبل جواده يسحب عنانه بصهيله
ومن كثر نوح زلزل العالم عويله
ينادي الشهيد حسين طاح على الوطيه
وتزلزلت لجله سماوات العليّه
والارض ترجف وانكسف نور لمضيئه
والكون مظلم والملا دمعه يسيله
وزينب من شافت جواد حسين خالي
صرخت بعالي الصوت يا عززي ودلالي
في وين طحت واحنا بغير والي
منهوياري خيامنا ويكفل العيله
مدري طحت في وين يا باقي البقيّه
يا خلصي باجيك وردى ما عليه
آنا وحریمك والیتاما الهاشمه
السجاد عندي بالمرض مدهوش باله
متحيره والحرم كلها حولي تنوح
وجسمك رميه فوق حرّ الترب مطروح

والخيم محروقه بهالبر وين أنا روح
وأهلي على الرمضا تون وأنا ذليله
والليل اقبل والعدو من حولي يحوم
والحرم كلها مروعه وبحال ميشوم
جوع وعطش وحده تطيح وحده تقوم
والسجاد طايح بالمرض زايد عويله
الليل اقبل مالنا مخيم ولا رجال
هيهات عيني تام لو تهدأ الأطفال
وانت على الغبرا يا خويه فراشك رمال
وأنا ضعيفه وحاييره بكثرة العيله

* * *

سؤال السجاد (ع) عن أبيه واخوته

صاح العليل ومدمعه بالخد همال
زينب ياعمه وين ابويه وين لبطل
وين العشيره وين سردال الهواشم
ساقى العطاشى مروي قلوب الفواطم
وين الأخو لكبر وين الولد جاسم
وين لبدور الساطعه وفي وين لرجال
اشوف الخيم كلها خليه وين لنصار
قالت ودمع العين فوق الخد نثار
كلها ضحايا ذبحوا صغار وكبار
وضلوا رمية بلا غسل في حر لرمال
قلها ابويه وين قالت بالمعاره
ينخي أولاده واخوته وجمله انصاره
حنّ وتزفر والدمع منه يتجارى
السيف يميني والعصا في كفي لشمال
نادى يبويه ما اقدر اسمع لك تنادي
مفروود حابر تنتخي بين الأعادي

ومن عزوتي ما ظل احد يسرج جوادي
أخواني تفانوا والخيم كلها بلا رجال
قلّ الشهد حسين ارجع للصياوين
وكفل خواتك عقب عيني والنساوين
انت الخليفه تصير بعدي ونور للدين
وانت الذي تباري الضعينه في هالأطفال

* * *

حرق الخيام وخروج زينب بليتام

يا لها ساعة عظيمه في الزمن ماكو مثلها
يوم حرقوا للخيم فرت النسوان كلها
سلبوهم شتوهم صاروا بحال ميشوم
مسلبين مروعين ذي تطيح وذي تقوم
وزينب تنادي عليهم وسطة البر وتحوم
تلم وتجمع في اليتاما تايه في البر كلها
تصيح يا غوث المنادي يا شبل حامي الدخيل
حريمكم بين الاعادي حايرين بلا كفيل
منهو يجمعنا ومن يبري اليتاما والعليل
البواچي والحنين دموعها دايم تهلها
زينب تنخي وعلي السجاد يجذب ونته
والشهيد حسين في الغبرى رميه جثته
والشمر متشمت ويصفق كفوفه براحتة
يصيح يا زينب اخوانك بالثرى اذبحت كلها
وانت وايتامك حواسر مالچ محامي وعضيد
اول انوديچ للكوفه وتالي عند يزيد

بالحبال ادخلوا المجلس مثل سوم العبيد
بحبل مكتوفين كلكم فعلة ما حد فعلها
نادت الحورا ودمعها فوق خدها هلته
المشتكى الله من يزيد اللعين وفعلته
يقتل أهلي والعشيره وغصب نسوته
واحنا من بيت النبوه عترة العالي فضلها
ارجالنا كلها نذبحت والخيم كلها حرقوها
عناد مروا بي على أهلى بلا دفن صرعى تركوها
والحرم من غير والي وعلى الهزل ركبوها
بالتعب والجوع وفراق الأهل ذلها وذهلها

* * *

شكوى زينب (ع) لبني هاشم

الليل اقبل والاعادي حايطينا
وخيمنا بالنار محروقه علينا
ياهلّ المروه والشيم يا آل هاشم
ترضوا علينا بين لعدى بغير راحم
ناس تسلبنا وناس لينا تشتم
في وين احنا نلتجي قولوا إلينا
عشنا بعزكم يا أهل من جور ليام
والليله الارض سوده يا خوتي بحرق لخيام
تدروا حرمننا مروعه وعدوان ظلام
منهو من اهلي من ارض طيبه يجينا
مرت ليالي العز وراحت يابن لطياب
البارحه كل الهواشم حول لطناب
وهاليله مذبحين كلكم فوق لتراب
وعندي عليل يذوب العالم ونيه
البارحه الشبان كلهم في خيمنا
والحرم باتت بالمعزه مطمئنه

الليله مذيبح أخوتي واتجرّ ونّه
مقدر اعد مصابنا الجاري علينا
حسين يا سور العذارى يا عمدنا
البارحه انت وبو الفضل عباس عندنا
وهااليله نمتوا والعدو شتت شملنا
وايتام عندي مروعه والليل جانا
الليله علينا موحشه بضجة الايتام
ليتك ترانا تشوف ساعة حرق لخيام
النسوان فرت والعدى يا خوي ظلام
واخاف خويه من الصبح يمشي ظعنا

* * *

ونين الحسين (ع) وخطابه لزینب

طوح الونه بو علي وضجت الأطفال
وسالت دموع الكون لجله والعرش مال
ظل بالثرى يجذب ونينه ويشعب الروح
ولملاك تبكي في السما والقلم واللوح
والارض والسكان كلهم في بچا ونوح
وجسم الشهيد حسين مرمي فوق لرمال
وشحال زينب والیتاما وتسمع حسين
يجاذب ونينه في الثرى مقطوع لیدین
نادت يا خويه وين جسمك يا ضیا العین
احب أوصلك بالمعركة أنا ولطفال
ودي أجی لك یا الأخو ودي أجی لك
آنا واطفالک مع جملة حریمک
وماتقدر تجینا ولا تقدر نجی لك
وآنا ضعيفه وحایره مابین لنذال
وتدری الحرمة مالها عزم ومهاره
تمشي مع الاطفال في وسط المعاره

وعندي مريض في الخيم دمه يتجارى
واحنا سبايا وعزوتي كلهم على رمال
معلوم عندي من الصبح هالظعن بيشيل
وكلنا حريم وكفيلنا مغلل بزنجيل
وانت على الرمضا طريح بغى تغسيل
وغصب مع العدوان نركب وياالطفال
والله يا خويه مفارقك غصب عليّه
فوق الهزل واهلي على الغبرى رميه
شاقول ليهم لين قالوا خارجيه
واحنا بنات المصطفى وراسك بعسال

* * *

أنين الحسين (ع) وسلبه

حسين يا شيعه رمية على الثرى دمه يسيل
إيشوفه وإلسمع غصب عبراته تسيل
ظل على الرمضا رمية والضعن عنه مشى
يفجع العالم ونينه يوم امساه المسا
والعليل يصيح والايتم كلهم والنسا
وزينب تنادي على فرقها ودمعتها
سافرت عنه وظل مطروح ماح غسله
شاف بجدل خاتمه الي يلوح بمفصله
ويل قلبي قام يحزه بخنجره ويمثله
والشهيد حسين دامي النحر على الغبرى جديل
واعظم امصبيه التي تخلي الكبد متفطره
يوم اجا الجمال شاف حسين جثه مطبره
راد يسلب دكته وعجز ماله مقدره
حسين مد كفه عليها وقطعها ودمه يسيل
قطع اليمنه ومد لشمال أبو سكنه الغيور
والارض صارت برجفه والسما رادت تمور

والخلايق معوله تبكي مثل نفخة الصور
من اجل سبط النبوه لا يظل عاري جديل
تهبط الأملاك كلها والنبى لزيارته
بالشرف تتبرك وتحصل سعادة بتربته
الله يساعد امه الزهرا الي شافت جثته
مقطع الكفين دامى النحر وجروحه تسيل

* * *

رض جسد الحسين (ع) بالأعوجيه

ما قط سمعنا ولا رأينا في البريه
جسم يدوسونه بخيل الأعوجيه
جسم الذي تربى بحجر أحمد المختار
بالخيل داسوا فوق صدره قوم الأشرار
وزينب تنادي والدمع بالخذ نثار
وتشوف جسم تحت الأعوجيه
لو تعلمي يا خيل من داستن صدره
هذا الذي للدين يشفيه ويجبره
وهذا الذي طول الدهر للخلق عبره
تهمل عليه دموعها صبح ومسيه
ما خفتي من الله وراعتي المختار
وراعتي الزهرا وعلي حيدر الكرار
دستي على كنز لعلوم وكنز لسرار
دستي على نور النبوه في البريه
لملاك ضجت في السما والجن له تنوح
تنادي ماشفنا خيل داست جسد مذبوح

واما الشيعة في المآتم ذوبها تنوح
وتبجي على جسم ترضه الأعوجيه
المشكى الله من فعلة الارجاس
خلوا الشهيد حسين بالميدان ينداس
جسمه على الرمضا وفوق الخطي الراس
والحرم فوق الهزل بدموع جريه
واما الشيعة تنوح كل يوم مصيبه
نوب على الي خضبوا بالدم شيبه
ونوب على الي على الهزل راحوا غصيبه
ودخلوهم المجلس على الطاغي هديه

* * *

حرق المخيم وسلب النساء

هجموا الاعادي على الخيم شبوا النيران
وتفارت ليتام كلها مع النسوان
وزينب بقت متحيـره وتصفيـج بليدين
والنار تسعر بالخيم وسط الصياوين
وتعاين الشبان في الغبرى مطاعين
كلهم عرايا بلا دفن بغير اكفان
نادت ودمع العين فوق الخد همال
حرمه وضعيفه ومبتليه بحرم واطفال
ما عندنا راحم ولعدا كلهم انذال
وعندي حريم مسلبه واطفال رضعان
وينك يابو فاضل يولد المرتضى ثور
عاين خواتك بالفضا تاهت بالبرور
يابو الفضل سلبوا اليتاما وحرقوا الخدور
وظلت خواتك حايره من غير وليان
وين التجي ومن انتخي وفي وين آنا روح
وانظر اخويه حسين بالميدان مطروح

والولد لكبر صار جسمه موزع جروح
وجاسم بعد مثله رمية فوق تربان
نخيت وظنيت الأعادي يرحمونا
وبسياطهم بعد السلب خويه ضربونا
جدنا النبي وبويه علي ما راقبونا
جوع ونهب سلب وشتم مايبهم إحسان
المشتكى الله وما فيهم مروه
ما نقدر نقاسي المصايب مع البلوى
إلينا الله ياخوتي وإليكم الله
نسافر مع العدوان في وداعة الرحمن

* * *

ركوب النساء على الهوازل

جابوا الهوازل للسفر واقبل الحادي اينادي
وزينب بقت متحيره بيتامها في الوادي
ميصير أسافر والأخو حسين مرمي عاري
ابلا غسل وبلا كفن دمه يسبح وجاري
مصبيه عظيمه ما جرت أعلى الخلايق غيري
ليسر امضي واخوتي صرعى على هالوادي
ماكو مروه ولا شرف واسلامكم عفتونه
قتلاكم ادفنوها وسبط النبي اتركونه
بنخي العشيره من هلي ايجون ويشيعونه
قال الشمر يازينب تمشون بلغصب وخوانج اهل الوادي
صاحت عجل باودع اخواني وبمشي عنهم
غصب عليه امشي عنهم ولا ادفنهم
مجبوره ومقهوره بأيتام عندي كلهم
ياليتني ويا الجثث ابكى بهذا الوادي
اركبنا الهوازل يالأخو غصب علينا نمشي
مدري في وينه نصبح ومدري في وينه نمسي

انخدره ومحجوبه واليوم يطلع حسي
صاحت عجل في وداعة الله يا عزيز الزهرا
عنك اسافر يا لأخو وانت طريح الغبرى
هالسفرة الميشومه صعبه وعليه كشره
ذبحت جميع اخواني ومدري في وين أولادي
في وداعة الله بو الفضل عباس نور اعيوني
وياك جيت امن الوطن في كربلا عفتوني
هيهات انساكم يا لأهل لا تنسوني
اركبنا الهوازل يا لأخو وطوح يا خويه الحادي

* * *

عتاب زينب (ع) ووداعها لرحيل

حادي ضعنا صاح انهض يا ولينا
نسافر مع العدوان ما ترضى علينا
ترضى يا ابو السجاد نمشي ويا لجناب
واحنا بنات المصطفى وربات لحجاب
وجسمك يا خويه يظل رميه فوق لتراب
هذا السفر اكثر يا بو الشيمه علينا
هالسفر والله يالأخو صعبه عليه
وجسمك بلا غسل ودفن عاري رميه
اتمنى ابكى وياك لو يحصل بديه
في البر مع الايتام نبجي يا درانا
لكن يا خويه وداعة الله الله ويّاك
بالغصب امشي ويا العدى واصعب فركاك
أعوفك على الرمضا ولا أدري وين ألكاك
وأبنك علي السجاد فاجعني ونيه
واعظم امصبيه ضجت النسوه وليتام
ليجابوا الهزل اعاديننا الظلام

منهو الذي يركب النسوة يا ابن لكرام
واحنا غرايب والأعادي حايطينا
قلها صبري يا مخدره السجاد عندچ
ماحد كفو من هالعدى يوصل اليمچ
فضه وعلي السجاد يركبوا الحرم عنچ
ومن قبل ما تمشي الضعينة يغللونه
وسار الضعن فيه اليتاما مع النسوان
وزينب على كور الجمل تنظر الشبان
كلهم على الغبری بلا غسل وبلا أكفان
صاحت غصب فوق الهزل عنكم مشينا

* * *

مجي السجاد (ع) لتجهيز الحسين (ع)

مصيبة المظلوم يا شيعه مثلها ما جرى
ظل ثلث أيام عري بلا غسل فوق الثرى
ارض وادي كربلا من طيب جسمه معطره
جثته فوق الثرى فيها السهام مكسره
ومقدر أوصف حالة السجاد من جا يقبره
شاف جمع من النساء ورجال حوله تنظره
صاح بيهم ليش جيتوا للجنايز تنظرون
جيتوا للفرجه عليهم لو إليهم تقبرون
أنا شبل حسين لا تخافون مني وتجزعون
با الله عينوني على مواراتهم وسط الثرى
بالعجل حفروا ضريح حسين سلطان الملا
وبعده انواري لجساد الي بجنبها مزمله
وجسم ابويه حسين ما ينشال چيف انزله
بحفرته وضلوع جسمه بالخيول مكسره
إنچان تحصل باريه با الله حضرو الي بالعجل
ونلم أوصاله التي اتكسرت والي انفصل

وبالقبر أنزله من غير كافور وغسل
ولملاك تعيني في شيل جسمه ونقبره
ولمصيبه يوم جابوا الباريه يم الجسد
جمع عظامه ولفها ونزله وسط اللحد
صاح بويه نهدر كني وما بقى ليه جد
كيف الم عظام جسمك في البواري ونقبره
يا حبيب الله وحبيب المصطفى وريحانته
يا حبيب المرتضى حيدر علي مع شيعته
يا عظيم الشأن عند الله بحياته وموته
امصابك الي بالخلق ما صار مثله ولا جرى

* * *

الفصل الثامن
في
اللطهيان

نوحيه على الامام الحسين (ع)

يا نور يا نور يا حجة الله تبجي الخلق لجلك بالليل ولنهار
يا حجة الله

يا من وسيله للخلق والكون ينعى مصابه
والرسل والاملاك بالتعظيم كلهم احبابه
وبه آدم اتوسل الى الجبار والله اجابه
وحسين نوره بالعرش واللووح هو حجة الله

في حسين سر مكنون من نور النور لأهل الديانه
بالدنيا عزنا وفي القيامه بحماه وهو حمانا
توسل بأسمه نوح وربى نجاه وسط السفينه
يا رحمة الله يا حبيب المختار يا رحمة الله

حسين يالى في الملا من نورك نور الأيمه
توسل بك ابراهيم وصارت له النار برد وسلامه
شيعتك بالدنيا ووعدھا وياك يوم القيامه
في الجنه بجوارك تفوز وتلقاك يا حجة الله

يا من في قبره وسيله للناس
وموسى توسل به وربى نجاه
والروح عيسى فى الولاده نجاه
وما ينسى حسين وحریمه ولطفال
كلهم يزورون
من كيد فرعون
سر الله مكنون
يا حجة الله

* * *

وما ينسى يومك يا بن حامى الجار
واحبابك احنا ونذكر عليك اشصار
وطول العمر لجلك نعزي ونوح
حبك سرى بدمنا ولحمنا يا حسين
فى يوم لطفوف
ما بين لصفوف
والدمع مدروف
يا حجة الله

* * *

يا حسين ما ننسى الحرم والاطفال
وحده على الهامه تصك بالكفين
ووحده تنادي غبت عنا فى وين
ترضى شيمكم سلبونا العدوان
من شبو النار
وحده بلا خمار
يا حامى الجار
يا حجة الله

* * *

محب الحسين (ع) في الجنة

روح إلى الجنة يا لمحب ويا حسين روح إلى الجنة
لك ما تمنى من الحور وولدان لك ما تمنى

يا لي تحب حسين صدق وافهم قول النبي وخله اقبلبك وعلم
يوم الحشر من النار تنجى وتسلم هذي الأخبار من النبي المختار وليه لطهار
من اجل لحسين هلت دمة العين وتحصل الجنة يا لمحب ويا تحصل الجنة

ولي يحب حسين هذا شأنه طول العشر يبجي بثوب احزانه
هو كل جملة هله وضعانه ذوبه ينوح للمذبح والقلب منه مجروح
يا محبين لجل حسين

تفوزوا بسعاده في الحشر وتدخلوا الجنة

طول العمر إلى القبر بالشيمه
ما ينسى حسين وهله وحريمه
لجله انذبح حتى الصغير افطيمه
ما انساك قلبي وروحي وياك ويوم القيامه بحماك
اهتف ونادي يا حسين
بحمماك يا نور العين رايح الجنة

قال الشهيد حسين يا شيعي صبر وبنور حبك للولايه اتصبر
بقولك وفعلك صير فيه منور والله يعينك من اجل دينك صفى يقينك
وبالصبر مثل حسين
قوي لعزمك زين وادخل الجنه

ياالمحب لو شفت ميت شايليه لحفرته
اذكر إلي ظل على التربان مرمي جثته
بالعوادي رضضوا جسمه وسلوا نسوته
آنا حسين يا شيعتي يا طيبين افديكم وافدي الدين
ذكروا مصابي دايم ابدمع العين
فوز وسعاده ومكرمه وهور وعين داخل الجنه

مصيبة الامام الحسين (ع)

يا شيعه نصر وا الدين ونحوا على حسين اويلاه على حسين
ضحى بحياته واخوته لدين اويلاه على حسين

تشوف ليتك يا شيعي تنظره وتشوفه مذبح ظامي وجبدته ملهوفه
جثه بلا راس قطعوا اكفوفه يالمحب لجل الدين ابجي على حسين
اويلاه على حسين

شالوا براسه في الرمح واطفاله تنظر إله بدموعها الهماله
جسمه على التربان ما حد شاله يا شيعي بالكفين تلطم على الخدين
وتنادي عزها حسين اويلاه على حسين

ليتك تعاین يالمحب للشبان جثه على جثه التربان وغدران
امطر حه ومزمله بليا اكفان يا مسلمين لجل الدين
غسلوا الجنائز لا تظل بتربان اويلاه على حسين

ومن كربلا ساقوا للكوفه وزينب تنادي اشلون خي اعوفه
عنه أنا أمشي وچبدتي ملهوفه اعلى التربان من غير غسل واكفان
عاري يظل جسم حسين اويلاه على حسين

* * *

ساقوا الضعينه والحراير بالنوح وحسين بالتربان جسمه مطروح
وزينب تنادي القصد لا وين انروح يهل الشيم يرضى الدين
اجساد اخوتي مطروحه ويا حسين اويلاه على حسين

* * *

مصرع العباس (ع) يم المشرعه

قطعوا كفوفه ووقع بالمشرعه راسه مفضوح ويدينه مقطعه

حسين ينادي انكسر مني الظهر خويه العباس وقع يم النهر
والسهم بالعين دمانه تخر وحسين يبجي ويهمي مدمعه

واقف ومختار ولا عنده أحد ما عنده اخوان ولا عنده ولد
وركنه انهار ولا عنده جلد ينظر انصاره ضحايا مصرعه

عود للخيام ودمعه يهمله يندب العباس راعي الرجله
تخليني مختار بوادي كربلا وسفه على جسمك أوصاله مقطعه

نادى يا زينب ودمعه يثره بالعجل قومي طلعي يا مخدره
احجاب صونچ وقع فوق الثرى مفضوح راسه ويدينه مقطعه

طلعت بلوعه وحسره امّ الخدر شافت أخوه حسين محني الظهر
نادت ياخويه وين عزري والدخر قلها على المسنات يم المشرعه

صاحت يا مظلوم جيبه للخيم اغسله بدموعي أنا ويا الحرم
قال إلها ما ينشال راسه انجسم ودموم جسمه تسيل فوق المشرعه

* * *

صاحت يا خويه حسين عزي يا شهيد صرت مفروود ولا عندك عضيد
خلنا نداوي البطل الدوا براسه يفيد قلها مخه على چتافه وعينه مشلعه

* * *

وداع زينب (ع) للعشير

هاليله في وداعة الله يا هلي هاليله انتوا معايا وتحرسون العليه

في وداعة الله يا سليل الزهرا الليله معايا والخيم مزهره
الشبان بالقران تحكي وتقرا توصي بنا ودموعها مهموله

في وداعة الله يا عزيز الهادي الليله معايا واخوتي واولادي
ولنصار كلها تنتخي وتنادي بنصر ك ياخويه حسين عز الدوله

اضيوف عندي يالهواشم كلكم وباجر على حر الثرى انظر كم
وماقدر اعاينكم وشوف اجثكم وشنهو البصر منهو إليباري العيله

يا حسين يابن امي ويانور اعيوني ياريت اهلي وعزوتي دفتوني
ولا الأعادي بعدكم يولوني وبعد الخدر اركب على مهزوله

قلها الشهيد حسين زينب صبري امر انكتب باللوح لازم يجري
لازم اتشوفي الشمر راكب صدري أوصيچ ياختي اتكفلي ابها العيله

يَمّ المصايب شاركي في امصابي لا تكثري من النوح ومن اعتابي
وبلغي سلامي شيعتي واحبابي ابلا غسل جسمي ولا اُحد شاله

* * *

صاحت عجل في وداعة الجبار لجلك عفت اهلي أوكل ادياري
أودعك والدمع مني جاري ودموع عيني عالوجن مهموله

* * *

وداع زينب للحسين (ع)

يا حسين ذاب افادي يا حسين ذاب افادي
جسمك ياخويه على الثرى وطوح ياخويه الحادي

يا حسين أنا ويا الحرم في حالة ميشومه اركب ذليله ميسره فوق الهزل مظلومه
واطفال عندي مروعه مسبوبه ومشتومه ويا لأعادي نمشي وجسمك يظل بالوادي

ياخويه من يحميننا من العدى ويرعانا ومنهو إلينا في الدرب يسمع إلى شكوانا
ومنو يجيب اميّه ليصاحت العطشانه ماكوا احد يرحمها والقلب منها صادي

ياللي جبتنا من الوطن يابو الفضل بحماكم امن المدينه الكربلا محلا السفر وياكم
بعز وجلاله والشرف يمشي على ممشاكم حسين خويه عزى وعباس ظهر سنادي

واليوم في ولية عدو فوق الهوازل نمشي بعطشنا وبجو عنا نصبح عليه نمسي
ياليتني قبل السبا واريتني في رمسي ولا أراكم في الثرى صرعي بهذا الوادي

واعظم مصيبه لين جابوا الهزل ودنوها وقالوا يا زينب للسفر اطفالكم ركبوها
والجثث كلها بالثرى صرعى دفنوها وغصب عليه امشي وانتوا ابحر الوادي

في وداعة الله يا أخويا عزنا ويا حمانا متحيره في جسمك مرمي وفي ممشانا
ومدري على طول السفر منهو الذي يبرانا قال إلهاراسي بالضعن بالليل يضوي الوادي

* * *

نخوة زينب لأمر المؤمنين (ع)

حيدر قوم ساقوا القوم ضعن الفواطم يا علي
ثور الساع يا مناع زينب ذليله بلا ولي

زينب يا حامي الجار بين العدوان
تمشي ذليله ميسره إلى الكوفان
چنك ما تدري بحالها والنسوان
في أي حال بين انذال حرمه يسيره بلا ولي

كيف الحرم تمشي بلا وليها
لو غيرتك ترضى العدى تحاجيها
وحسره تراها تسمع بواجيها
فوق اكوار يا كرار حرات تمشي بلا ولي

لوفي الشرايع يا علي ضرب دفوف
لو طار والنسوان بالسكه عكوف
والخلق من كل صوب للفرجه صفوف
والحرات منصوبات لجل الشامتة يا علي

ابدا ما شفنا في الملا يا كرار
ولا سمعنا في جميع الأمصار
إسلام نسوه في مجلس كفار
وبين عدوان بالديوان توقف ذليله بلا ولي

ليتك تراها واقفه في المجلس
تحفي النياحه الراس منها منكس
وكفيلها بلغال جسمه ملبس
والعدوان في الديوان يمنه وليسره ممثلي

عتاب زينب لأبي الفضل لعباس (ع)

يابو الفضل ثور يابو الفضل ثور
انت إلى الشدات مدخور يابو الفضل ثور

زينب ذليله ميسره يا ضرغام
ترضى عليها خدره مع ظلام
وياليتاما والنسا ركبت على كور
يابو الفضل ثور

يا شبل حيدر يالبطل يا عباس
ترضى ارواح ميسره بين ارجاس
وانت كفلتني وانت وافي الباس
وهاليوم ما عندي ولي والدمع منشور
يابو الفضل ثور

يابن الميامين من آل ياسين
ترضى النساوين تركب بعارين
ما عندها معين تلطم الخدين

بين الأعادي والعليل بقيد مأسور
يابو الفضل ثور

الدمع هامبي ومالي محامي
ما بين كوفي وما بين شامي
ولعدا يسمعون ضجة ايتامي
ينظرون لينا بفرح وسرور
يابو الفضل ثور

يا نور عيني عنكم خذوني
وعلى متوني بسوط ضربوني
والراس برماح تنظر عيوني
واجسادكم صرعى بلا قبور
يابو الفضل ثور

ليتك يا ضرغام تنظر لليتام
بولية الضلّام والدمع سجام
فوق الهوازل بنروح للشام
واحنا ناديك بقلب مفطور
يابو الفضل ثور

ليتك يا مناع تشور هالساع
وتنهض بسيفك من نومة لقاع
ترضى علينا نمشي بلا قناع
وبالغصب ساقونا على كور
يابو الفضل ثور

فهرس ديوان اللتهاب - الجزء الأول -

الفصل الأول ﴿ في رثاء النبي محمد (ص) ﴾

- النبي محمد (ص) ٤
في شأن النبي محمد (ص) ٥
في شأن النبي محمد (ع) ٨
في وفاة الرسول (ص) ١٠
الزهاء (ع) بعد وفاة والدها ١٢
في وداع النبي محمد (ص) ١٤
في وداع النبي (ص) وأئمة البقيع ١٦
مصاب الزهاء (ع) بالنبي (ص) ١٨

الفصل الثاني ﴿ في رثاء الزهاء (ع) ﴾

- فاطمة الزهاء (ع) ٢٠
وصايا الزهاء (ع) للإمام علي (ع) ٢١
في رثاء الزهاء (ع) ٢٣
وداع الزهاء (ع) للحسن وحسين (ع) ٢٥

الفصل الثالث ﴿ في رثاء الامام علي (ع) ﴾

- الإمام علي (ع) ٢٨
توجه الامام علي (ع) للجامع ٢٩
في رثاء الامام علي (ع) ٣١
في ضربة المحراب ٣٣

فهرس ديوان اللتهاب - الجزء الأول -

- مرض الامام علي (ع) ٣٥
وفاة الامام علي (ع) ٣٧
ملك الموت عند أمير المؤمنين (ع) ٣٩
خروج روح أمير المؤمنين (ع) ٤١

الفصل الرابع ﴿ في رثاء الامام الحسن (ع) ﴾

- خطاب الحسن (ع) لخيّه الحسين (ع) ٤٥
وصية الحسن للحسين (ع) ٤٦
دخلت زينب على الامام الحسن (ع) ٤٨

الفصل الخامس ﴿ في رثاء الامام الحسين (ع) ﴾

- الامام الحسين (ع) في دار الوليد ٥١
في خروج الامام (ع) من المدينة ٥٣
خروج الامام (ع) من مكة ٥٥
وداع محمد لأخيّه الحسين (ع) ٥٧
مسير الحسين (ع) وخطابه للمنيه ٥٩
مصيبه الامام الحسين (ع) ٦١
سير الحسين (ع) إلى كربلا ٦٣

الفصل السادس ﴿ في رثاء مسلم ابن عقيل (ع) ﴾

- مسلم ابن عقيل (ع) حابر في الكوفه ٦٧
في رثاء مسلم ابن عقيل (ع) ٦٩

فهرس ديوان اللتهاب - الجزء الأول -

- رمي مسلم من أعلى القصر..... ٧١
وصول خبر مسلم للحسين (ع)..... ٧٣
في رثاء أولاد مسلم..... ٧٥

الفصل السابع ﴿ من مصاب الامام الحسين بأرض بكر بلا ﴾

- وصول الحسين (ع) أرض كربلا..... ٧٩
نزول الحسين (ع) أرض كربلاء..... ٨١
معاينة زينب (ع) للجيش..... ٨٣
سؤال الانصار عن هذه الأرض..... ٨٥
رسالة الحسين (ع) لحبيب..... ٨٧
خروج حبيب لنصره..... ٨٩
وصول حبيب إلى كربلا..... ٩١
رويت زينب (ع) للجيش..... ٩٣
خطاب الحسين (ع) للأنصار..... ٩٥
توديع زينب (ع) لاختها..... ٩٧
مقارنه بين يحيى والحسين (ع)..... ٩٩
العباس (ع) يطلب الرخصه..... ١٠١
العباس (ع) يطلب الرخصه للماء..... ١٠٣
حملة العباس (ع) على القوم وبعد..... ١٠٥
خطاب العباس لزينب (ع)..... ١٠٧
القاسم يطلب الرخصه..... ١٠٩

فهرس ديوان اللتهاب - الجزء الأول -

زواج القاسم ابن الحسن (ع)	١١١
شجاعة القاسم في الميدان	١١٣
مصرع القاسم ابن الحسن (ع)	١١٥
علي الاكبر يطلب الماء من أبيه	١١٧
شجاعة علي الأكبر (ع)	١١٩
صولات الاكبر في الميدان	١٢١
مصرع علي الاكبر (ع)	١٢٣
وقوف الحسين (ع) على مصرع الاكبر	١٢٥
الحسين (ع) ينعى أهل بيته والأنصار	١٢٧
الحسين (ع) ينخى أخوته وأنصاره	١٢٩
الحسين (ع) يخاطب نفسه	١٣١
مخاطبة الدين إلى الامام الحسين (ع)	١٣٣
توديع الحسين (ع) للعائلة	١٣٥
وصية الزهراء (ع) لزینب	١٣٧
خطبة الحسين (ع) في القوم	١٣٩
مقتل الطفل الرضيع	١٤١
إجتماع الجيوش على الحسين (ع)	١٤٣
مجي الجواد خالي بصهيله للخيم	١٤٥
سؤال السجاد (ع) عن أبيه وأخوته	١٤٧
حرق الخيام وخروج زينب بليتام	١٤٩
شكوى زينب (ع) لبني هاشم	١٥١

فهرس ديوان اللتهاب - الجزء الأول -

- ١٥٣.....ونين الحسين (ع) وخطابه لزيب
١٥٥.....أنين الحسين (ع) وسلبه
١٥٧.....رض جسد الحسين (ع) بالأعوجيه
١٥٩.....حرق المخيم وسلب النساء
١٦١.....ركوب النساء على الهوازل
١٦٣.....عتاب زينب (ع) ووداعها لرحيل
١٦٥.....مجي السجاد (ع) لتجهيزالحسين (ع)

الفصل الثامن ﴿ في النواحي واللطميات ﴾

- ١٦٩.....نوحيه على الامام الحسين (ع)
١٧١.....محب الحسين (ع) في الجنة
١٧٣.....مصيبة الامام الحسين (ع)
١٧٥.....مصرع العباس (ع) يم المشرعه
١٧٧.....وداع زينب (ع) للعشيره
١٧٩.....وداع زينب للحسين (ع)
١٨١.....نخوة زينب لأمير المؤمنين (ع)
١٨٣.....عتاب زينب لأبي الفضل لعباس (ع)

لَا تُصِلْ عِلْمَ مُحَمَّدٍ وَلَا مُحَمَّدٍ عَمَلٍ فَحَبِّم